

Márkosarini kuku Wasina pakich kamanchinllpa yuwaa Márkosarini yandarangu anootsi

Sirútamasa tputs Márkosa suru taarangiya. Márkosarini Isusoo mangoonaranginya. Kanungasimasa waana wach' Isusoo paranginya. Mang, Isus putaam tsipachu, Márkosarinish wanir pang' Isus wipunashpat washunand katungaranganaya. Márkosarineetsi Bernabi waziparcha. Márkosarinsha wachinayaru, Papororinpat xiyrangiya Isusoo kuk kamanimaama. Márkosarin Pitorurinpat kapung xiyrangitamta. Anush Isusoo kuk kizpur yasarangiya.

Zapish, Pitorurineetsini Romash yakat tumanarangusin, anush Márkosarin istarangiya. Isusumun kuk kizpur kiyung kachiyarangana. Isuschichee wanipamasaja pacharangana tputs yutaritamashi. Kiyung kachiyarangana anush Márkosarinsha kirakaa yandarangiya; Isuschichee tuwizpurtamaam yandarangiya. Isus iyaam kizpur kiyung kachiyarangu tápi átu, kirakamun yandarangiya. Iysha Isus tamaparee ashiru kizpuritam kiyung kachiychiniya, watam Isus tárangewa, tárangewa Márkosarini. Utaáshucheem nda yandarangiya; itaru piyartacheem tputs yandarangiya.

Ashiriya, na yuwaa kamanirangu anoo pakich kamanchinllpa:

- A. 1.1-13: Tputs zapani Isusoo, Apanll Wipaya, tárangana. Wangarini ichumampani tárangu, misha Apanll Wani, misha Apanll waana tárangitamtaya; shiy nuwaa ipartishcha, tárangiya.
- B. 1.14 —8.30: Isus kizpuritaa taarangu, ashiritaa tputs, ¿Chak ashtar? tárangana Isusootsi. Isus tputsee zapan yararangu, wanasisritam tayaspatarangiya. Tputsha Isusoo natsarangana; itaru wipunashsha mangoonamana mangoonaranganaya. Zapishsha, Shiy Apanlltishcha Wipish, táranganaya.
- C. 8.31 —16.8: Isus kizpur wanasisir tayaspatarangiya. Maachee wasina yasachu itsinsaritam kamanirangiya. Waana zandarangu, yasinamun tsiparangiya; itaru yusur tamarangiya. Isus ashkachu anoo wipunashsha mangoonarangana; Isus kurakaa wamari kasiriya. Tsapurunasshuchee tputsi tapachindapi átu tsiparangiya.
- D. 16.9-20: Isus wipunashee, Tputsee ichinguru tayaspatahaintsa, tárangiya.

Tárangiya Márkosarini.

Nuw Márkosí yuwaa Isus tayaspatarangu anoo kamanchintspa

(*Matiwa 3.1-12; Lukasa 3.1-9, 15-17; Wanga 1.19-28*)

¹ Na ichtaru, yuwaa Isus nish taarangu, iyaam yutaritshishirineemani tsiparangu anoo kamanchintspa.

² Sirútamasa zitaminarini Isáysarini yuwaa Apanll tárange anoo yandarangiy. Anush Apanll, tárange:

Mazinangtsa; Nuw ndatuma siyash kuschuri, nuw tsiyatssee kamanimapan zanganchima, tputsee mang' wasina yaramaama.*

³ Ipusa tputs mazinachinllinaya.

Na kurak kizpur naanllpa.

Ngootseem wanasis yarangtsa.

Ngootsee itsinsaru tuwitangtsa,*

uwsha táchparee, tárange Apanlliya.

⁴ Ashiriya, yuwaa, tárange anoo na tatsameenllcha. Wangarini ichumampanirini ipusap kusarangu amb tputsee chamayangayaru, tayaspatarangiya zapan tsupi. Yutaritshishireetsis kasakchus, kuzizimun kuskachu an mangeetsis tachingchintsa izuurashtaya, tayaspataku, tárange. ⁵ Utaáshuchinand yakat kus kus ashirangana. Irusarinshuch tputs kusarangtamsin, ichingurusin yutaritshishirineetsi kamanirangtamsin, Wangarinsha ichumarangiya Ortagush kungu.

⁶ Itaru, Wangarinshacha wamar kameechpat puru k'tama anpat kamartarangiya. Wichpooshshacha tasi kichpurangiya. Mishacha

* ^{1:2} Nishuri yuwartatam Malakiyasa 3.1 átu atitamta. * ^{1:3} Nishuri yuwartatam Isáysa 40.3 átu atitamta. Nish píntanaru tsiyatku, "Apanll naanllpa táchia. Mangeetsis yarangtsa. Ngootseetsi-naariya itsinsaru tuwitakpaz shingtsa," átpaz ashkiya.

watungash pchichpaz ashiru kindurpatpaz
ashiru íseeru katungarangiya.

7-8 Tayaspataku; tputsee mang' yaramaaam zandku, Nuwsha kungupa ichumakina. Itaru, nllitaritsha tputs kuzizimun kuschiya. Kizpur nuwaa kasiriya; nuw anpa waritareezi. Itaru, uwsha Apanlee Wani tputush tapshtukachu, Apanlleetsimari minamari mangooz chinachinllinaya. Ashku an kuskachu, nuwaa: Sapturee tpurinda tákchu, nuwataa pinasakina, watam kizpur kurakawa; tárangeiya Wangarini.

Ashiri yuwaa Wangarini tayaspatarangu anoo kamaneena.

Mishat, minush zari Wangarini Isusoo ichumarangu anoo kamanchintspa

(Matiwa 3.13-17; Lukasa 3.21-22)

9 Yuwashtam Wangarini tputsee ichumaku taaru anush ashishtaru anshutam, Isus Násaretush, Galileyash tsap káyaranllu, Ortagush kusarangiya. Anushcha Wangarin Isusootssha Ortagush kung ichumarangitamta. **10** Ichumaramchu, kungush kárirangu, kanindsha tawata ashirangu, Apanllsha Wani makook tamapari ashiru, karuwataranllu, Isusumun waziyarangiya; pshturangiya. **11** Kanindapsha íwarta k'kuz kizpur kimarangu; Nuw shiyyaa ipartana; tárangeiya. Shiyyamun mangi kischa.* Shiyyaa kizpur chinakina, mang tárangeiya.

(Matiwa 4.1-11; Lukasa 4.1-13)

* **1:11** Isáysa 42.1 tsiyatsis nipta tatsamooru taaritamta.

¹² Chumaramchu, Apanll Wani Isusoo machtarangiya yap kázamish taaru ambi. ¹³ Amb machip 40 maats taarangiya. Anush Yashing' kizpur kiyung yachayaru kasarangiya. Apanll wasundurur ksutarangiya.

Ashiri yuwaa Wangarini Isusoo ichumarangu anoo kamaneena.

Mishat, yuwaa Isus tayaspataamaam chtarangu anoo kamanchintspa

(*Matiwa 4.12-17; Lukasa 4.14-15*)

¹⁴ Yuwapur Herodesarin Wangarineetsi tumanaramchu anpurtam Isussha musap Galileyap kanapeeranllu, anush Apanllee kuk tayaspatarangiya. ¹⁵ Na waritayanllcha, tárangeiya. Musásiriparee Apanll waana kuschiya wamari kasimaama. Yutaritshireetsis kasayarus, Apanllee kuk mangoonangtsa; tárangeiya. Isus ántaru tayaspataamaam chtarangiya.

(*Matiwa 4.18-22; Lukasa 5.1-11*)

¹⁶ Tayaspataaru anushsha xiytu, Isus Galileymun mus wing' Simoo chamayangarangiya. Sim zoonllpa Ándarispa kayupcheem kawaksin parangiya; watam kayupchipanimunawa.

¹⁷ Isussha, Nuwash tchitangandama, tárangeiya. Siy kayupchipanimunta taarangus, natsha tputsireetsi tayaspatatssa Apanllee mangoonamaama, tárangeiya. ¹⁸ Isus tárange, musásiritam ireetaa kasayarusin, Isusshuri tachitaranganaya.

¹⁹ Isus naantachu, Sípituyurineetsi wip, Sandeekurinee yusur chamayangarangiya. Zoonllpat Wangpata parangitamta. Kanush kuxineersin, ireetarineetsi yarayartat

ashirangana. ²⁰ Isussha: Naani; týaru, waparee botish istampanpat kasayaranllu, Isusush tachitaranganaya.

(Lukasa 4.31-37)

²¹ Minush zari Isus yaktash Kapárnáwash mang kusarangiya. Sápatush zari Utaáshuchish shaniyshini pshtuyaru, tayaspatarangya. ²² Isus tayaspataku, putitiri tsiyatarangiya; ichinguru tputs, punirustambach ashirangsin, Kizpur yasariya. Iyashuch tayaspatampani iwaziri tayaspatakana tárangana; manga.

²³⁻²⁴ Yuwash tayaspataku anush tputsh wanutsshuri yashing' pshturu, an tputs kizpur zunganeerangya. Isusoo, nuw shiyyaa yasatana; mang, tárange. Násaretshuchish shiyya. Apanlltishcha Wipish shiyya. ¿Siy tamakatshasha ningeema? ¿Iyaa kachingamaam nda zandkish? mang týaru, ²⁵ Isussha: zamangi shiyya. Yashingoo, shtungangi; mang, tárangya. ²⁶ Tputssha kizpur nungtarangu, kizpur Ay tákchu, yashingsha shitungarangya.

²⁷ Tputssha punirustarangusin, waanpatatin tsiyatarangana. ¿Tamashta tputsh yashing taaru anoo tashitungak? tputs tárangana. ¿Kaneeschee k'kuz tayaspataka? ²⁸ Uw kuk kizpurparee, tárangana manga. Anurisha Isusoo kuk Galileyshuchish pzapaneerangya.

(Matiwa 8.14-17; Lukasa 4.38-41)

²⁹ Isus Utaáshuchee shaniyshini shitungeeranllu, Sandeekpa, Wangpa, ipuneersin, Simosh pang' pshturangana. ³⁰ Simsha umeena kanumtarangya. Simsha Isusoo: Kumini kanumtakcha, týaru, ³¹ Isussha Simoo umeenaa uw putayaru,

tunuxinarangiya. Ipuritara ashirangiya. Kizsha mang tputseem yásirangiya.

³² Zar tapitanu, tputssha wamkuree wanguyaamachtarangana. Kas yutamaa, yashing' zutarangu anootstam Isusungaz kusarangana.
³³ Ichinguru tputs yaktash taakana an kusta kusta ashiranganaya. Pshtushinung shaniyarangana. ³⁴ Isussha kas yutamaa yararangiya. Yashingootstam tashitungata tashitungata ashirangtamta. Yashing' uru Isusoo natstarangu, itaru Isussha: Yashingoo, zamangi; kamanishpa tárangeya.

(Lukasa 4.42-44)

³⁵ Putamsha wandari tapiri ndaturi taraseeru, Isus shitungarangiya. Upusupsha naatarangu, Apanllpata tsiyatarangiya. ³⁶ Simsha wamkurpat ipuneersin, Isusungaz nachungarangana.
³⁷ Pakeeshtisin, Shiyangaz ichingurusinzandkana; tárangeya. ³⁸ Isussha: Pzaya; nllitaritap tsap naayani; tárange. Nllitaritap tsap tputsee kamanchima, mang, tárangeya. ³⁹ Minushsha zari Galileyapsha tsap naatarangu, shaniyshishush zapanish tputs pshtuyaru, tayaspatarangiya. Amb yashingoo tashitungarangitamta.

Ashiri yuwaa Isus tayaspataamaam chtarangu anoo kamaneena.

Na minootssha kamanchintspa; yuwaa Isus wanguyaayararangu anootsi

(Matiwa 8.1-4; Lukasa 5.12-16)

⁴⁰ Anpurtam tputs wanuts itsaptaku an Isusunung tutunlltayaru masharangiya. Shaana zandkush, nuwaa yareerush, tputsspa kis ipunpi átana,

tárangiya. ⁴¹ Isussha kapung nayanirangu, paxayaru, tputsee patatarangiya. Shiyaam istamaam zandaktana; wanasisirish taangcha, tárangiya. ⁴² Natamatamatma tputs wanuts yarangiya; tputsshá nllitarit ndusha tsachirangana. ⁴³⁻⁴⁴ Isussha wanerangiya; Na naangcha. Itaru, tputsee kamaniyshpa. Apanllip pang' naakchush, apanllpanee nutseetsish yámandashini. Móysisarinee kamachtamarini tuminungcha. Maachee wanuts Apanlleem mbutamaam wayangcha. Ashkachish anush tputs shiyyaa natstachinllinaya; Na yareenlliya táchinllinaya shiyaatsi, tárangiya Isusu.

⁴⁵ Isus tárangitaa, naayaranllu, uwsha tputsee kaman kaman kaman ashirangiya. Ashiriya, yusur Isus yaktash kis taamaam pinasarangasha. Itaru, upusap ambirisha taarangiya. Ashirittaa, tputs ichinguru upusap kusataranganaya Isusungazi.

2

(*Matiwa 9.1-8; Lukasa 5.17-26*)

¹ Iwapayaramchu, Isus waptam kanapurangiya Kapárnáwapi. Ashpatam zar anush taarang, tputsshá: Pangusush Isus taartanda, atusin, ² zapan kusataranganaya. Anush shaniyarangusin, pangusush tatsitarangiya. Móysisarineetsi kuk tayaspatakana an anshutam kuxinaranganaya. Mishat, ashpatam wishchip shaneey ashirangana. Pshtushinungiri tstsarangana. Isussha pangusush Waparee kuk tayaspatarangiya. ³ Isus wanutsee muxaxa yarap, atusin, tputs ipunpunaru wamkuree nllamush kuyarandsin Isusup

naatarangana, manga. ⁴ Itaru, pangusush tputs
 tstsarangiya. Isusush kusamaam xararangana.
 Ashirucha, pangusish íwar káreersin, pangusee
 tawateersin, yaruwarangana wanguyaatsi.
⁵ Isussha pakeeru, watam nuwamun mang'
 tatkanaawa átu, wanguyapatsha tsiyatarangiya.
 Zuwa, yutaritshishirish tachingamcha; mang
 wanguyaatssha, tárangeya. ⁶ Itaru, Móysispaniri
 wirkari kamanimapani mangush chinayarusin,
⁷ ¿Chiy tamaree tputsee tachingchich? Apanlleem
 kinapi atupa atiya. Apanllimari tachingamaam
 waritakiya; chiy tputsich tachingamaam
 pinasakchi, mang mangshuri, tárangeana Isusootsi.
⁸ Itaru, Isus waantari mangush yasarangiya
 chinarangana anootsi. Ashiri Isussha:
 ¿Mayaamsha ashiru siy mangishis chinaksa?
⁹ tputs yutaritshishee tachingamaam pinasakcha.
 Tputsee ituyamamaam pinasaktamta. Itaru,
 nuwshacha yutaritshishee tachingamaam
 waritaktana. Chiyzayarush, nllamareetsish
 yáyarush, naangi táchima. ¹⁰ Nuw tputseem
 kinaranguri, nish tsapurunasush kusarangina.
 Ashiri yutaritshishee nuw tachingamaam
 waritaktana, mang, tárangeya Isusu. Táyaru,
 wanguyaa tasaseeru, ¹¹ Chiyzangi zuwanlee;
 tárange, Chiyzayarush, nllamarish yáyarush,
 pangiptamtish kanapungi; tárangeya tputsee
 wanuts muxareetsi. ¹² Tputs ichingurusin parsin
 naturitam wanguy chiyzayaru, wayanllamaree
 yáyaru, naatarangiya.

Itaru, tputssha anoo pakeersin punirus-
 tarangana. Apanlee: Shiy kizpurtishcha, Apaa.

Ashima patareezini, tárangana manga.

Ashiri yuwaa Isus tputsee yararangu anoo kamanneena.

Mishat, Parísiypanshuch tágaspatash Isusoo nat-sarangana anoo kamanchintspa

(*Matiwa 9.9-13; Lukasa 5.27-32*)

¹³ Minush zari Isus yusur musamuna wingu naatarangiya. Anshutam tputs kusta kusta ashirangsin shaniyaranganaya. Isussha tayaspatarangiya, manga. ¹⁴ Ashirucha, tayaspatayanllu, naantachu, Leviya, Árpiyurini wipa, chamayangarangiya. Leviy kurakamun misarini kuxinxinaw ashtariya; gobernoom kurikee putamaama, watam kurikpanimunawa. Isussha: Leviya, nuwash ipunsheemi tchitangandama; mang tágaru, uwsha ayu tágaru, tachitarangiya, manga.

¹⁵ Anumunsha Leviyah pang' kuseersin, Leviypat katungaranganaya, wipunashpatatamta. Gobernoo urkir yampan, misha Apanlee kuk mapiyrangana antamsin katuranganaya. Zapan tputs Isusungaz tachitatarangana. ¹⁶ Itaru, Parísiypanshuch tágaspatash tputs anoo pakeersin, Isusoo wipunash tsiyateersin, mashirangana. Móysispaniri wirkari kamanimapani tárangitamsina: Isus kurikee yampanpata katungkiya. An tputs yutaritcha. ¿Mayaama ashka? tárangana. ¹⁷ Yuwaa ántaru anoo Isus mazinayaru, Tputs matambshinand taaku, anush doctor mangu taakiya; ¿mayaamaja doctorap naach? tárangiya. Itaru, wanguyaatsim istamaam toktur waritakiya. Nuwsha doctor

tamapari ashiru taakina. Tputs waanamuntari mang' tatku, ¿tamaree nuw anoo istachi? Itaru, tputs yutaritaata taaku, itaru nda waanamuntari mang' tatku, nuw istamaam waritaktana Apanllee mangoonamaama, mang, tárangeya Parísiypanshucheetsi.

(Matiwa 9.14-17; Lukasa 5.33-39)

¹⁸ Minush zari tputtsha yuwamand Wang wipunash mangukana anumand Isusoo mashimaam zandarangana. Ashiriya, tputtsha Isusoo: Wang wipunash zapan zari mangukana; Parísiypanshuchtam ashkitamana. Itaru, shiysha ipunshish mangukazinllinaja. ¿Mayaamsa nda manguktamsa? mang tárangana Isusootsi.

¹⁹ Ashiri Isusssha: ¿Natuma mayaamaja musá manguchini? tárangeya. Apaz kamuz kizaa yamakchu, uru wamkuree yambiyambtachiya. Kis katungkanaya. Ndatuma kamuz wizanllpat shitungkuru, pastacheeja, ndambaree. Uru shambatchinllinaya. ²⁰ Itaru, zapish shitungachu, arap naakchu, manguchpasinaya. Ashikpaz ashkina; nuw naakchuri, ipunshi anush manguchpasiniya; tárangeya Isusu. ²¹ Mishat, kamanchintspa, nitaati kamisaa kaneesich yáyaruch, kucharimun matacheezich, ndambari. Ashkinaari ashiru, mangu kucharimun siritku, kucharsha itsupkachu, aranginash izichimbachiya. ²² Mishat, kamanchintspa; ¿tasish sirapchish mayaamaja vinoo kchita tuzurchich? Ashkachinaarich, kapootkachu, tas ituweeru, vinsha tuchumchiya. Tsimbun itsanchich, min vinootstam, min taseetstamta. Ashiri tasish kaneeschish vinoo kchit tuzurchich.

Ashikpaz ashkich, taarashish tsimbun payumaam pinasakich, tárangeiya Isusu Parísiypanshucheetsi.

(Matiwa 12.1-8; Lukasa 6.1-5)

23 Mishat, Sápatush zari Isus tputshish mazari mang xiytat ashirangiya zari kanusisschu. Tirik' anush tatsumim xiya ashirangiya. Ashiri Isus wipunash wanusee pusata yumbeeta pusata ashirangusin, wchoo katungarana.

24 Itaru, Parísiypanshuchsha mashirangana; ¿Mayaama nda sápatush kanuskana? tárangeana. ¿Mayaamaja yaanpata k'kuzee kapeetkana? mang, tárangeana. **25** Isussha: Watam nuw kanusisshee kasikinawa; tárangeiya. Apanllee kuk natstaktaatis, itaru kaapa nda mangoonaksa. Dapiyarini sirútamasa undararee puniku, wipunashpat suwarangusin, mariz kayatkusin, ¿tamarangeeja?

26 Apanllish pang' pshturangu, pangaa Apanlleem wayarangana anoo yáyaru, katungarangiyi. Wipunasheemtam panarangiya katungamaama. Uwaam anoo katungamaam nda waritarangiyi. Apanllpanimari anoo katungamaam waritarangiyi. Itaru, ashtaa, Dapiyarinsha wipunashtam katungarangtamana. Anpuru Abiyatararini apanllpan urkari taarangu, Dapiyarini ashirangiya. Dapiyarini Apanllee kuk nda kapeetarangana.* Ashiritamta nuw ipunshi nda kapeetkana. **27-28** Watam Apanll tputseem kanusisshee wayaranguwa. Nuw sápatush zari, kanusisshutaa kamachtamaam waritaktana. Watam nuw tputseem kinaranginawa; mang, tárangeiya Isusu.

* **2:26** 1 Samuela 21.4 tsiyatsis nipta tatsamooru taaritamta.

3*(Matiwa 12.9-14; Lukasa 6.6-11)*

¹ Minush sápat Isus shaniyshshush pshturu, tputs uw mayapshimaa parangiya.
² Parísiypanshuch táyaspataš anush shaneer-tamsin, napataranll ashirangana, manga. Waanpatatin tárangana; Kamapa saptush zari wanguyaa yarchiya kanusisshu, tárangana. ³ Itaru, Isussha mayapshimaa Naani, táyaru, uwsha Isusunungsha xiayarangiya. ⁴ Sheeru, Isussha Parísiypanshuchpasha tsiyatarangiya. ¿Utaáshuchini kamachtamarini kanusisshu amka? ¿Antaatiya kiyung yachangi saanpatata táranll? nduni. Istamaam waritakiya; kanusisshutaa istangtsa, átcha. ¿Antaati pchangints át? nduni. Chinamaam, nyanimaam, kanusisshutam waritaktamta, Isus támpu, uwshuisin yámarangazinllinaja.

⁵ Isussha Parísiypanshuchee natstayaru tsiyantarangiya. Mangoonamaam ngatkanawa átu, mang' mantsarangiya. Wanguypashat tsiyatarangiya; Zuwaa, kuwish pxayangi; tárgu, uwsha uwi paxayarangiya. Paxaykachu, uwi wanásirireerangiya, manga. ⁶ Parísiypanshuchsha anoo pakeersin, tsiyantayarusin shitungeersin, Herodesarini Galileyshuch kurakarini anchichpat washunand shaniyeersin, waanpatatin tsiyataranganaya. ¿Tamaycheezich Isusootsi? Watam ashkuwa; pchanda átparee; mang, tárangana.

Ashiri yuwaa Isus tayaspatarangu
 Parísiypanshuchsha tsiyantarangana anoo
 kamaneena.

Mishat, yuwaa tputs Isusoo kuk kis mazinarangana anoo kamanchintspa

⁷ Minushsha zari Isus wipunashpa ipuneersin, Galileyap musash xiyrangana. Itaru, Galileyshuch tputs zapan Isusungaz tachitaranganaya. ⁸ Isus kas yutamaa yararangu; yashingoo tashitungarangitamta atusin; anoo mazinayarusin, tputs zapan kusarangana, Utaáshuch misha Irusarinshuchi, misha Idumeeyshuchi. Mishat, tputs Ortaganung arachichtam. Mishat, Tírshuchi. Mishat, Sitónshuch aship an tputs kusarangana. ⁹ Isus wipunasheetsi: Kan yarartangi. Tputs nuwaa kanaxarundama; tárangeya. ¹⁰ Wanguyaa zapan yararanguwa. Ashirucha, Isusoo wanguyari patatpanda atusin kusta kusta ashirangana, yarpanda atusina.

¹¹ Mishat, yashing' Isusoo pakeeru, Isusush watsee pshiyrataranllu, Shiy Apanlltishcha Wipish, tárangeya. ¹² Isussha yashingoo, waneerangu, Tputsee kamaniyshpa nuwaatsi; tárangeya. Támbeeranllu, Isus naatarangya.

(Matiwa 10.1-4; Lukasa 6.12-16)

¹³⁻¹⁵ Minush zari Isussha: Pza, naamani machpi, týaranllu, machip kárirangya. Isussha wipunasheem k'tsas arangtach tsimbun matayaru (12) ipusarangya, tayaspataamaama, misha yashingoo tashitungamaama. Nuwaana wizpuriri siyaam panayana; ashiri siysa tayaspatahinta tápi átu anoom ipusarangya.

¹⁶ Simoo ipusarangya. Isus Simoo tsimbun tsurtarangya. Minam Pitoru misha Simo.

¹⁷ Mishat, Sandeekurini zoonllpata Wanga; washunand Sípituyurinee wip ipusarangya.

Anootsim Powánarkisa ísamarangiya. Iyashuch k'kini kariyamashi tputsi atiniya,¹⁸ Ándarisaa ipusarangtamta. Felipeetstam, Bártolomiyaatstam, Matiwaatstam, Tomásaatstam ipusarangtamta. Sandeekoo, Árpíyurineetsi wip ipusarangtamta. Tadeyoo ipusarangtamta. Simoo minu ipusaran gitamta. Uwsha Sim sirú Romshuchee kapung natsarangu, nllitaritush Kanaanshuch tputs tachitarangiya.¹⁹ Utaásarini, sura Iskáriyotam ipusarangtamta; Isusoo waanaatstaata tamapingarangu anoo ipusarangiya. Aship washunand an 12 ipusarangiya, manga.

(Matiwa 12.22-32; Lukasa 11.14-23; 12.10)

²⁰ Minush zari Isus nllitaritash pang' pshtuyaru, yusursha tputs tstsayarusin, Isus wipunashpa katungamaam xapoorangiya. ²¹ Isus maachirit anoo mazinayarusin naatarangana. Isusoo yamaani; miroosinllparee; tárangana.

²² Móysispaniri wirkari kamanimapan Irusarinush káyashinusin, kuseersin, ¿Antaati Apanllimun wizpuririni Isus Yashingoo tashitungak? tárangana. Yashing' urkari Isusush pshturangiya. Ashiri Yashingumunari wizpuririni tchiyakiya yashingoottamta, mang, tárangana.

²³ Anumandsha Isus tputsee kuruzeeru, pindanayaru k'kuzee kamanirangiya. Antaati nuw ashkeezi, nda, tárangiya. ¿Tamaree yashing' waanpatatin tashitungach?²⁴ Tputseetsinaari ashikpaz ashiru kamanchintspa. Tputs waanpatatin pachat pachat ashkusin, musá chingachpasinaya. Waanpatatin kachingeersin,

ndusha kizpur taachinllinaya. ²⁵ Zoonllpatatin ashimaam taaritamta. Waanpatatin waratkusin, washunand taachazinllinaja, ndambaree. Ashkachinaariya, ndusha kizpur taachinllinaya. ²⁶ Ashikpaz ashkiya Yashingootsiri atashina. Uw Yashinguri waanpatatin waratkinaariya, waanpatatin tashitungakinaariya ashiriya, ndushaparee kizpur taachinllinaya; mangu waanpatatin pchingachpasinaya. Itaru, yashing' ashtareeja; watam kizpur taakanawa; tárangiya Isusu. ²⁷ Mishat, mazinangtsa; apaz tputs kizpur taaku, waanaatsi pang' ksutataw ashku, ¿tamaree nllitaritsa tputs shuchich? Pshtupi átu, maachi yapi atitaa, itaru ndunnaa tputsee kasiku, ¿tamaree pshtuch? Itaru, tputsee kasiku, kamuriyaru, pshtumaam kamirana. Maacheetsi yamaam kamirantamta. Nuwsha ashkitamana yashingoo kasikina kizpureetstaata.

²⁸ Mazinangtsa; izuuru kamanchintspa. Tputs yutarit taaku, yutaritshishee ichinguru tachingamaam waritakcha. Apanlleetstaa yutarit tsiyatku, tachingamaam waritamana waritaktamcha. ²⁹ Itaru, minumari tachingamaam wanindaja. Yuw tputs Apanlee Wani yutaritam ínaku anootsina zapshita tachingamaam wanindaja; tárangiya Isusu. ³⁰ Isus anootstam tsiyatarangiya, yuwamand Yashingumunari wizpuririni tchiyakiya yashingootstamta, tárangana anumanda.

(*Matiwa 12.46-50; Lukasa 8.19-21*)

³¹ Ashiri ántaru anshu Isus wanir wipapa kusarangiya. Kuseersin, wishchip xkiyeersin, Tputseesha: Naani taangcha, áttanda táshini,

tárangana. ³² Tputs zapan Isusush kuxinartayarusin; Ichee, zuwanllamtish, aneertamtish xiyeersin, shiyangaz nachungakanapa, shiyapa tsiyatpi átu; tárangana. ³³ Itaru, Isussha tputsee: Yuw tputs Apanllee kuk mazinaksin, izuuru payuku ancha nuw aneeri, nuw zuwanlli; tárangya. Táyaru, ³⁴ natpunuyaru tputseetsi turipingarsin, Watacha nuw aneeri, nuw zuwanlli ashiritam chinaktana. Watacha niya shaneeris anootsis, tárangya. ³⁵ Tputs, Apanllee kuk izuuru payuku ancha nuw maachiriti. Nuw zuwanlltana, nuw izartamana, nuw aneertamana, tárangya Isusu.

Ashiri yuwaa tputs Isusoo kuk kis mazinarangana anoo kamaneena.

4

*Mishat, yuwaa Isus tsiyatssee mangoozee p'tsimaam kamanirangu anoo kamanchintspa
(Matiwa 13.1-23; Lukasa 8.4-15)*

¹ Ashiri Isus musap naateeru, kuseeru, yusursha tayaspatarangya. Itaru, tputssha kusta kusta kusta ashirangana. Zapan tputs shaniyeersin, Isussha kanush zaruyaru kuxinarangya. Tputssha upewamun napataranll ashirangana. ²⁻³ Isus kanush zaruyaru, tayaspataku tsiyatssee mangoozee p'tsimaama kamanirangya; itaru k'kuzee pishumpaz ashiru kamanirangya. Tárangya;

Tputs tatsumpi átu mzatsip naatarangya. ⁴ Mzatsush tirikoo wach kurutkachu, ashpatam wach ngootsish pantsarangya. Ngootsush tamutatumumchu, tsiripichsha pisharangya; mangu kachingarangya. ⁵ Kurutkachu,

ashpatam wach patumbchish tazitaru pantsarangiya. Anush musásiri kxoonamana kxoonarangitaa, itaru tsap pakchimuna, ashiri iwaziri kxoonarangiya. ⁶ Ashiriya, zarsha zatarangu, musásiri mawirurangiya, watam iwazi xixpurtaranguwa. ⁷ Ashpatam kpash pantsarangiya. Washunand kpapat kxoonarangiya; itaru kapsha yambutarangiya. Ashirucha, purangu nda yusirangu. ⁸ Itaru, ashpatam wach tsappa wanasisrimun pantsayaru, kxoonarangiya; wanasisrsha yusirangiya. Zapan yusirangiya. Ashpatam 30 wchoo yusirangiya. Ashpatam 60 yusirangiya. Ashpatam 100 yusirangiya. ⁹ Tputs Apanllee kuk mazinaku ashikpaz ashkiya. Ashiri ngutis mazinarintspa; kaapa mangoonangtsa; tárange. Táyaru kasarangiya.

¹⁰ Isus tputsee kasayaru, wipunashpa 12 taarangu, wamkursha: Tsiyatssee wazareetsiri kamaningcha. ¿Tamaree yasachini? táyarusin, ¹¹ Isussha: Siyaam wazareetsiri kamanimaam waritarina; tárange. Apanll anoo chinakiya. Nuwash izuuru tchitangandama átu, siyaam mangeetsis p'tsimaam kamanchintspa. Itaru, tputseetssha wazaree kamancheezi; Apanllush tachitamaam kamapshichima, watam ngatkanawa.

¹² Nuwaa kuki zapantaa mazinaksin, ashiritaa nda mangoonkanaya.

Nuw kizpur istaktaati, anoo pakitaatssin, nduntam mangoo p'tsichima. Mangoontapa, aturi,

nda mangoo yaramaaam zurampatari zandkina,*
tárangeya Isusu, manga.

¹³ Nee tsiyatssee ndunnaa mazinakus,
¿tamayaree minootsinashtaja tsiyatssis
mangoonchis? ¹⁴ Tatsumapanpaz ashiru
Apanlee kuk tatsumkiya. ¹⁵ Ashiriya,
wach ngootsush pantsarangu anoo tputs
mazinaktaatssin, yashingsha mangoontapa
átu tputsee tsiyatssee tatutsta tatutsta ashkiya.
¹⁶ Ashpatam tputs Apanlee kuk mazinaktaatssin,
mang' kis mazinakana. Itaru, Apanlee
yuwamand kiyung kachiykana anumand
musásiri kasakanaya. Tputs ashku an watacha
wach patumbchimun pantsaku tamapari
ashkana. ¹⁷ Iwaziri mangoonkana. Mangoozpa
pishtaku ashkiya. ¹⁸ Wachsha kpash pantsarangu
anu, tputs maachingaz támaraksin tamapari
ashkiya. Apanlee kuk mazinaktaa, ¹⁹ itaru
kurikingazeemari chinaku, maachtangaz
támaraku, Apanlee kuk kapeetkiya; mangozee
yambutakpaz ashiriya. Mazinakitaatssin,
mapeektana atusin, Apanllush nda tachitkiya.
²⁰ Tsap wanásirimun pantsarangu an wachpaz
ashiru izuuru kxoinkachu mangoonkanaya.
Apanllush tachitkusin nda kasakanaya. Wach
yusikpaz ashkiya; tárangeya Isusu wamkureetsi,
manga.

(Lukasa 8.16-18)

²¹ Minsha tsiyatssis mazinangints; mang Isus
tárangeya. Nambarin tiruyaruch, taramzish
wantsush nda wayakich. Antaati kajonish

* ^{4:12} Nishuri yuwartatam Isáysa 6.9-10 átu atitamta.

wayakich, nduni. Uru wazaree wayatarchi. Ashiriya, pamaam tputs kamirancha. Ashiriya, nuwaa kuki shingtamtса. ²² Natuma nuwaanaatsi pishum tamapari ashiruri, yusur ichinguru yasachpasinaya. Natuma ipishungarangitaati, yusur wazaree yasachpasinaya. ²³ Ashiri tputs nuwaa kuki mangoonamaam zandkusin, wits mazinachinllinpa; tárangeiya.

²⁴ Papsa; kaapa mazinangtsa. Nuwaa kuki wanasis mazinakchus, aranginasha yusur mangoonatssa. Kapung mazinakchus, kapung mangoonatssa. ²⁵ Mangoonkinaareesa, aranginasha aranginasha ashtatssa. Itaru, nda mazinakus, pakchimana mangoonkachus, nda mangoona-maam izuurisha itutschima, mang, tárangeiya Isusu.

²⁶ Tputs: Apaa, shiyamari nuwaa ksingandama átu, uwsha kasiku anoo kamanchintspa; Isus tárangeiya. Apanlee kuku wach tatsumimpaz ashkiya. Tputs wchoo tatsumku, waanitam kxoonkiya. ²⁷ Tputs nda paru, maata, putam maata, putam maata ashku, zapish wach ptutpyaru, kxoonkiya. Waantarisha kxoonkiya. ²⁸ Tsap wchoo yanungakiya. Sheeru, zapishsha kunganreesha; yusikshita. War pakich shitungkiya. Shitungeeru putsisayasha, yusikiya; kayanakshitya. ²⁹ Kayanakchu, pusayaru, wayakiya. Apanll kuk ashikpaz ashiritamta izapaneekiya; mang, tárangeiya Isusu.

(*Matiwa 13.31-32; Lukasa 13.18-19*)

³⁰ Apanll tputsee mang' kasiku anoo misha kamanchintspa. Mangeetsis p'tsimaam kamanchintspa. ³¹ Kuchpaz wach tatsumkuch

ashkiya. Kuch wach pakcheewa. Nllitarit wach kapungcha. ³² Itaru, kuch wach pakchitaat tatsumeeruch, itaru kanungachu, ichinguroo mzatsush tatsumtarich anootsina kasiriya. Wapzar taariya. Tsiripich ixatamaam waritariya wapzarshu. Ashikpaz ashkiya Apanll tputsee wamari kasiku; tárangeya Isusu.

(Matiwa 13.34-35)

³³ Isus tsiyatssee kamapishtamayaru kamanirangiya. Yuw mangoonamaam waritaru anoo tayaspataranginya. ³⁴ Tputseemana anootsiri kamanirangiya. Itaru, wipunashpa ipuneersin, wipunasheetsina wazaree kamanirangiya.

Ashiri tsiyatssee kamaneena yuwaa Isus mangoozee p'tsimaam kamanirangu anootsi.

Mishat, yuwaa Isus kambusuroo nambarangu, zanaramach ashirangu anoo kamanchintspa

(Matiwa 8.23-27; Lukasa 8.22-25)

³⁵ Natam zari pukamchu Isus wipunasheetsi: Mus arachich kiteeni, tárange, ³⁶ tputsee kamingeersin naataranganaya. Isuspa zarurangusin naatarangana. Ashpatam wipunash minush kan zaruyarusin naatarangtamsina.

³⁷ Kambusursha kizpur kambustaranginya. Warastarangu, kansha kizpur zaw zaw ashiranginya. Kanush tatsitamaam pakich pishtaranginya. ³⁸ Isussha maamawu muxaxamun ktuktuw maa ashiranginya. Wipunashsha: Isusoo papcha, támangi. Chiyzangi, chimukchinipa. Nishuripa tsipambachi. ¿Mayaama nda istaksha? tárangeyanaya. ³⁹ Táyarusin, mang Isussha támarangu, chiyzayaru, kambusuroo nambarangiya; Wappa.

Zanayangi; táyaru, anuri tsípatara ashirangiya. Zanaramach ashirangya.⁴⁰ Isussha wipunashee: ¿Mayaamsha puniksa? ¿Mayaamsha nda nuwamun mangis tatuksa? mang, tárangiya.⁴¹ Itaru, Isussha wipunash mang kizpur punirangana. Waanpatatshitisin tsiyatkusin, ¿Tamarée in tputs ashtar? ¿Kambusuroo tsiyatku, wappa átu anuri kambusur mazinak? ¿Warassha mazinaktamtawa? mang, tárangana Isus wipunashi.

Ashiri Isus kambusuroo nambarangu anoo kamaneena.

5

Mishat, yuwaa Isus yashingoo tashitungarangu anoo kamanchintspa

(*Matiwa 8.28-34; Lukasa 8.26-39*)

¹ Minush zari musaa kíteersin, Guerásshuchish watsapun kusarangana. ²⁻³ Isus káreeranllu, tputsee mang chamayangarangya. Sirútari tputush wanuts yashing' mang taarangiya. Patumbchishsha wach kawaru anush taarangiya; tsiparish wayashini taarangiya. Tputs kásimaam pinasarangana. ⁴ Tputs kateenpat kamurirusin, uweetstam kamuri, watsee kamuri sheersin, mang kateenpa kamurirusin, kateenaa itipta itipta ashirangu, tputs kamurimaam pinasarangana. Wizpur pshatarangana. ⁵ Ashiri suwayaranllu, tsiparish mapshishush taarangiya. Machip mangu xiytat ashirangya. Kaschiri psaanaritam kizpur jay, tárangiya. Waanaatsi ta ta wanutsee patumbichpata shitaru tza tza ashirangya.

⁶⁻⁸ Ashirucha, tputs arapiri Isusoo pakeeru, iriptaranll ashirangya. Isusush tutunllta ashirangu, watam Isus kamachtaku, Yashingoo, shtungangi; tárangeuwa. Isusoo, shiy Apanlliritishcha Wipish; mang, tárangeu. ¿Shiy tamakatshasha ningeema? ¿Shiy nuwaa tamayachtazish? mang, tárangeya. Nuwaa waneeriyshpa. Aparimunich tina, tárangeya.

⁹ Ashiri Isus: ¿Shiy chaksha surish? átu, uwsha: Nuw suri zapantanicha watam zapanniwa; tárangeu. ¹⁰ Itaru, uwsha Isusoo; Arap iyaazanganiyshpa; tátá tátá ashirangya. ¹¹⁻¹² Napangi piya. Piy machimun kuch zapan katungkanaya. Ashiriya, k'chish pshtupani atiniya. Anush zanganingandama iyaatsi, tárangeya yashingu. ¹³ Isussha: Naangsints, ashiriya watam átssawa; mang týaru, tputush shitungarangsin, k'chish pshturangana, manga. Kuchsha 2000 ashippari, wazawap turut ashiranllu, musash mang parat' ashirangu, musash chipuyartaranganaya. Itaru, yashingu mun tputs wanasisireerangya.

¹⁴ K'chipansha tputs suwarangana. Minupsha tputs kamanta minupsha tputs kamanta ashirangana. Yaktash kaman kaman mang ashirangana.

Tputssha anoo mazinayarusin, Isusupsha turut ashiranll mang ashirangana, pangani atusina. ¹⁵ Isusush kuseersin, yashingu mun wanasisir kamartaru, mangpatarisha taarangya, yuw sirú nuw wazapantanicha, tárangeu anu. Tputssha anoo pakeeru, kizpur punirustayarusin, ¹⁶ itaru, tputs Isus yararangu anoo pakeersin, Piytanda ashirangu, mang, tárangeana; apinll

kamanirangana. ¹⁷ Tputssha puniksin, Isusoo, shiy naachcha. Nish shiy taarinllpa; mang, tárangana. ¹⁸ Isussha zarukchu, yashingu mun tputs mang: Isusoo, kayunutamta, átu, ¹⁹ Isussha nda machku, Watsta. Waptam kanapungcha tárangu. Apanll shiyaa nayanirangu, ashiri maachiritaatsish kamanishinchá; táyaru, ²⁰ uwsha kamanimaam waptam naatarangya. Tikáporshu watsapun xiyrangu, kamanirangya. Minush yakat kamanta kamanta ashirangya. Ichingurusin tputs: ¿Tamaree ashik? tárangana.

Watamcha tsiyatssis yuw Isus yashingo tashitungarangu anootsi.

Mishat, yuwaa Isus kizaa tsimbun yararangu anu kamanchintspa

(*Matiwa 9.18-26; Lukasa 8.40-56*)

²¹ Minush zari Isussha mang yusur arachich kítarangya minupsha yakta. Mataykamchu, tputs kusta kusta ashirangana. Zapan tputs Isusunungi shaniyarangana. ²² Jayro, tputs sura, Utaáshuchish shaniyshini ksutamapanimunatamcha. Isusush kuseeru, mang tutunlltarangya. ²³ Ipari kiz tsipamaam zandakcha. Pza, pangatish. Shiynaapa kuwiptish patatkachush yarachsha; tárangya. ²⁴ Isussha: Ayu; táyaru, naatarangana Jayropta. Naantachu, Isusumun tputs zapan tachitarusin kandan kandan kandanta mang ashirangana.

²⁵ Kizsha tachitarangtamta. An kiz 12 masach kurassee kapeet kapeet mang ashirangya. ²⁶ Ichtaru doctorap zapan naarangu, zapan kiung kachiyarangya. Urkiree mangu

tuchingeeru, itaru yusursha aranginasha kizpurinasha misiseerangiya.

27-28 Isusoo kámanarangusin, kizsha Isusumun ush tachitarangiya. Wamaree patatkachuri, nuwaa yarachpari; mangush táyaru, Isusoo max wingootsim patatarangiya, tputs wazapan tstsaru anshu. **29** Patatkachu, mang ursir puzatar tsípatara mang ashirangiya. Yareeru, kizsha waana natstarangiya. **30-32** Isussha wizpuririneetsi yarkachu tácharangiya. Isussha: ¿Chaka nuwaa patateeranda? tárangu, wipunashsha: Ichee, tputs shiyaa kandan kandan kandan ashkusin, ¿mayaamsha, Chakaja nuwaa patatkanda; shiy átsha? tárangu, Isussha tputsip natpunuyaru, tputsush wach napta napta ashirangiya. **33** Kizsha Isus nuwaa yareenlttee átu, kizpur punirustarangiya. Tata tata shitar ashirangiya. Isusush tutunlltayaru, ichinguru yuwaa kiyung kachiyarangu anoo kamanirangiya. **34** Isussha: Izari, nuwamun mangish taturangush, yararangina nuwa. Na yareenlltishcha. Mapiyrush naachcha; tárange.

35 Isus kizapat tsiyatstaru, anush Jayroshuch tputs kusarangiya. Waanpatashtisin tsiyatkusin, Iparish tsipayanlluwa, Jayroa. Ashiri Isusoo yamarinllpa. Watstaya; yaani kanapuni; mang tárange. **36** Itaru, Isussha, Mangish mantsarinllpa, zuwaa. Nuwamun mangish tatungcha; mang, tárange Isusu. **37** Isussha, yaani napani átu, wipunashinandaritaa tapusarangu; Pitorpa, Sandeekurinpa, zoonllpat Wanga, ashpisin naatarangana. **38** Jayrosh

pang' kuseeramchusin, Isus tputsee zapan parangiya. Uwi tuwá tuwá ashishtarusin tanuksin parangiya. ³⁹ Pangusush pshtuyaru, Isussha: ¿Mayaama tanukus, kuweetsis tuwá tuwá ashiksa? Antaati pzurareeja; nllur maarimanda, mang, tárangeiya. ⁴⁰ Tputssha mang starangana. Isussha tputsee: Pangusush shtungangints; tárange, shitungaramchusin, waparpat wanirpa ashiru pshturangana nllur wayaru anshu. Isus wipunash anshutam pshturangitamta. ⁴¹ Ashiri Isus kamasinamun uw putayaru, waanshuchiri kuk: Tárita kúmi; tárangeiya. Iyashuch k'kini: Izaree, natu támangi; mang átu, tárangeiya. ⁴² Táyaru, chiyzata ashirangiya. Chiyzayaranllu xiytaramach ashirangiya. An kiz 12 masachirini taarangiya. Wapar Jayor punirustambach ashirangana. ⁴³ Isussha: Tputsee kamaninllpa; mang, tárange. Wanireetssha: Maritangcha; táyaru, kasarangiya.

Ashiri wappari kamaneena yuwaa Isus nlluraa ituyamarangu anootsi.

6

*Minootssha kamanchintspa; yuwaa
Násaretshuch tputs Isusoo nda kis mazinarangusin,
Isussha nllitaritap tsap tayaspatamaam
naatarangu anootsi*

(*Matiwa 13.53-58; Lukasa 4.16-30*)

¹ Ashiri Kapárnáwash anush tsapoo kasayaru, Isus wipunashpat kanapurangu, yaptam kanungarangu ambtam naatarangiya. Anush Násaretush kuseeru, ² zari sápatush

Isus Utaáshuchish shaniyshini pshtuyaru tayaspatarangiya. Tputssha: ¿Tamaru ashiru tsiyatka? ¿Tamayarishta yasaya? ¿Tamaru tputsee yarka, tputsee ichiyzata ashka? tárangana.
³ ¿Ndusha in tputs nishuch? ¿Ndusha panguspan ini? ¿Ndusha Mariy wip? tárangana. ¿Ndusha Sandeek' zoonll, misha Ustam zoonll, misha Utaástam zoonll, misha Simotam zoonll? tárangana. ¿Wizar iyash taakanawa? tárangana. Atusin, Isusoo natstarangusin, natsaranganaya. Isusoo kuk kaapa nda mazinarangana. ⁴ Itaru, Isussha: Siy uru tsiyatssee kis payuksa. Apanlee kuk kamanimapan waanshuchpata tputs, misha zoonllpatatam uru nda kis mazinakana, átssa. Ashirucha, siy nuwaa ashkitampasa nda mazinamaam zandaksa, tárange. ⁵ Tputssha mang' tatumaam ngatarangana; ashirucha Isus tputsee zapan yaramaam pinasarangiya. Tputsimun uwee wayayaru, machin yararangiya.
⁶ Ashiri Isussha: ¿Tamashta nda mangoonkana? táyaru, kasayaranllu, minush zar minupsha yakat tayaspatat minush zar minupsha yakat tayaspatat ashirangiya.

(Matiwa 10.1, 5-15; Lukasa 9.1-6)

⁷ Isus wipunashinandsha 12 kuruzeeru, shaniyeersin, Isussha; Siysa tsimbun ipuneerus piyam naaku, piyam naaku shintsa, tárange. Wizpuriri siyaam panachintspa tárange. Siyamari yashingoogoo kasichpasa, mang, tárange.

⁸⁻⁹ Naakchus, maacheetsi yarintspa; tushuwshimtis yángtsa. Itaru, pangaa, misha tsingasheetstamtis yarintspa. K'tunaris minamari k'tuntayarus, spatayarus naangtsa.

Kurikireetsis kichpushis pshtayarus yarintspa, tárangeiya.

¹⁰ Tputsush pang' kuskachus, anshuri taangtsa; tárange. ¹¹ Yaktash kuskachus, itaru nda tputs kayunu taayani átu, natsaku, siyaa mazinamaam ngatku, ashiriya wanimaam kutsis káchingayarus naangtsa, Isus tárangeiya, manga.

¹² Wipunashsha ayu atusin, mang naataranganaya. Yaktash kuskamchusin tayaspatarangana. Mangishis itsinsayashtis chinangtsa; yutaritshishee ksangtsa; tárangeana. ¹³ Yashingoo zapan tashitungarangitamana. Mishat, kas yutamaa wayungunpa taparayarusin yararangtamana. Ashirangsinchá.

Ashiri yuwaa Isus wipunashee kamachtarangu anoo kamaneena.

*Mishat, yuwaa tputs Isusoo yasamaam pinasarangana anoo kamanchintspa
(Matiwa 14.1-12; Lukasa 9.7-9)*

¹⁴ Anpurtam Herodesarini, Galileyshuch urkari, tsiyatssee Isusumun mazinarangija. Watam tputs Isusoo tsiyatat tsiyatat ashiranganawa. Ashpatam tputs: Wangarineeza wa ichumampani; Isusoo, tárangeana. Wangarineetsini pacharangana na támeenllparee; anparee. Ashirupa tputsee yarkiya; tárangeana, manga. ¹⁵ Itaru, ashpatam: Elíyasazuwa yusur kuseenlliwa mang, tárangeana. Mishat, ashpatam: Apanlee kuk kamanimapan, ¿zitamarini ndusha támeenll? anparee, mang ántangat ashirangana.

¹⁶ Herodesarinsha tsiyatssee Isusumun mazinayaru mang: Wangarineetsi kamachtaranguri,

muchoo tururangana. ¿Anuzuwa, támeechinuwa? anparee, tárangeiya.

17-18 Sirú Wangarini Herodesarinee nambarangu, ¿Mayaamsha zuwanlleetsish, Felipeets wizanll isuwarangsha shiya? An yutarita; tárangeiya Herodesarineetsi. Anumandsha Herodesarinsha Wangarinee putayaru, tumanarangiya. Tumaneeru, kateenpat kamuriyaru, kasarangiya.

19 Herodesarinsha wizanll Wangarineetsi natsarangiya. Pachamaam kamachta-maam zandarangu, itaru xapoorangshita.

20 Herodesarini Wangarineets chinamana chinarangiya. Herodesarini: Wang wanasicra. Yutarit taakeeja; pachamaam watsta tárangeiya. Wangarinsha tumanshishush tayaspataku Herodesarinsha: ¿Tamaru tayaspataka? tárangeiya. Itaru, tayaspataku, kis mazinarangiya. **21** Kis mazinarangitaa, ashiritaa wizanll Wangaa pachamaam zandarangiya. Minushsha zari, yap nda chinakich amb Wangarineetsi tupchamaam kamachtarangiya.

Herodesarinisha yuw nllurtarangu an masachirini tatsamkachu, tputsee zapani kuruzurangiya. Kurakaa misha komandannteetstam, misha Galileyshuchetstam wirakuch zapan kuruzurangiya. Naanints, shaniyeeruni katungeeni; zamamteeni; tárangeiya. **22** Anushsha wizanll wip pshtuyaru, michitchitat ashirangiya. Herodesarini wamkurpa kis napataranll ashirangana. Herodesarinsha kamasinaa: Nuwaa mashamaam zandkush mashangandama nuwaatsi, tárangeiya. Yuwaa

zandkish anoo panachinllpa, tárangu. ²³ Zurkuri atina. Aparimunich sura atina. Ngichkeez. Shiy mashkachush, uru panachparina. Zandkush, nuwaanaatsi tsapunee tapuseerunll panachinllpa; ashtachinllpa, tárangiya. ²⁴ Kamasinsha shitungeeru wanireetsi: ¿Nuw mayaatsi mashchi? táyaru, wanirsha: Wang muchoo, ichumampani mashangcha muchootsi, tárangiya. ²⁵ Kamasinsha mikeeru kurakush pshtuyaru, Naturi Wangaa much ichumampani panangandama. Paratush pshtayarush panangandama, tárangiya.

²⁶ Ashiri Herodesarinsha mang' kizpur mantsarangiya. Itaru, wamkur napanapawu Herodesarinsha pazirangiya. Dancha, watsta támamaam mbamatatarangiya, watam: Yuw zandkish anoo panachinllpa, táranguwa. ²⁷ Sundarootsshhat: Wangaa muchoo turushini; tárangiya. Tumanshishish pshtuyaru, Wangarineetsi much tururangiya. ²⁸ Sheeru, paratush pshtayashinu, Neewa týaru, kamasinaam panarangiya. Uwsha yáyaru, wanireem panarangiya Wangarineetsi muchu.

²⁹ Wipunashsha tsiyatssee mazinayarusin, naayarandsin, kuseersin, Wangarineetsi tsiparee yáyarandsin, mapshiship kawineerangana.

Ashiri Wangarineetsi watamcha tsiyatssi.

*Mishat, yuwaan Isus tputsee kuwiz m'cheeru
milo martarangu anoo kamanchintspa*

(Matiwa 14.13-21; Lukasa 9.10-17; Wanga 6.1-14)

³⁰ Ashiriya, minushsha zari Isus táyaspatahsha kanapeeshinusin, Isusush shaniyarangusin, Apanllee kuk kamantayashinusin, Isusoo ichinguru kamaniramchinllina. ³¹ Mishat, anshutam tputtsha zapan kusatarangsin, kanusamaam xararangana. Katungamaam xararangitamta. Ashiri natam Isussa wipunashee: Pzaya; yaanita naayani yap tputs ndunari ambi, tárang, ³² Isuspa kanush zaruyarusin, arachich kítarangana. Yap tputs ndunari ambi naatarangana. ³³ Naakchusin, tputs zapan natstayarusin, wingumun iriputaranal ashirangana. Minshuch yakat shitungku piyamsha yakat minshuch shitungku, sheerandsin, ichingurusin wasina yamazarsin kusarangana. ³⁴ Isus mataykamchusin, káreeramchusin, tputsee zapan parangiya. Opeeja ashiru masaru taaru parangiya; yuw ksutamapan ndunpaz ashiru an parangiya.* Isus tputsee zapan pakeeru, nayanirangu, tayaspata tayaspata ashirangya. ³⁵⁻³⁶ Ashiri tayaspataku zar manginamun xameekamchu, Isussa wipunash: Tputsee zanganingcha katungtseema. Papcha, tapeekachpa; mang, tárangana Isusootsi. Nish upusap wanindaja. Ashiri ashpatam yaktap naakchusin, ashpatam tputtsip mazari naakchusin, katungtsee pangachpasinaya. Sheersin katungchinllinaya, tárangana. ³⁷ Isussha: Nduni; nishuri maritangtsa siya; tákchu, wipunashsha: Tputsinaarich minamta masach

* **6:34** 1 Utaáchich kuraka 22.17; Esekiyela 34.5 tsiyatsis nipta tatsamooru taaritamta.

kurikeem tarawaztayaruch, ¿tamaree ashpam tatsamooth? pshataru pishtachparee, tárangana.
 38 Isussha: ¿Wanipa pang taar? Napangints; tárange, wipunashsha pakeersin, Pang kuwiz m'cheeru taariya. Kayupichsha tsimbunund taaritamta, tárangeiya.

39 Itaru, Isussha tputsee kamachtarangu; Piyam kuxinta piyam kuxinta shingtsa chirichirimuna, týaru, 40 tputssha 50 kuxinta 50 kuxinta 100 kuxinta ashirangana. 41 Sheeru, mang pangaa yáyaru, kayupheetstam yáyaru, íwarsha kanindap naparangu, Apaa, wapparee; mang, tárangeiya. Týaru, pangaa tupta tupta tupta sheeru, wipunasheem panarangiya. Kayupheetssha tatapta tatapta sheeru, wipunasheem panarangitamta. Na siysa tputseem pana pana shingints; tárangeiya.
 42-43 Panayashtisin katungeersin, mang tazazartarangana. Wipunashsha 12 tsumb katuchimaa mang yarangana. 44 Kamuzananda zameetpata mil katungarangana.

Ashiri yuwaa Isus tputsee kuwiz m'cheeru milo martarangu anoo kamaneena.

Mishat, yuwa Isus kungumun naataru anoo kamanchintspa

(Matiwa 14.22-33; Wanga 6.15-21)

45 Natumatamcha Isus wipunasheetssha: Botish zaruyarus, arachich kiteerus, Betsáyanap wasina naatstsa; tárange, wipunashsha kanush zaruyarandsin naataranganaya. Naatarangsin, Isus tputseetssha: Pangipis kanaputantsa, tárangeiya. 46 Isus machip kárirangiya Waparpat

tsiyatamaama. ⁴⁷ Tapitaranllu, wipunash musush upusanand kchungatan ashirangana. Isussha urupunguri waanitari taarangiya. ⁴⁸ Kambusur kizpur kambustaranginya. Shipanung kambusur tap ashiranginya. Isussha wipunashi kizpur kchung kup kup shitar ashirangana punirustambatssin. Kiyung kachiyaranganaya. Isussha sitkachu naatarangiya. Kungumuna naantach ashirangiya. Wipunashingaz naatarangiya. Itaru, imarutachu parangana. ⁴⁹ Isusoo kungumuna naantachu parangana. Ay sitatstee; tárangana. ¿Chaka ashtar? Kanizparee, tárangana Isusootsi. ⁵⁰ Wipunash ichingurusin parangana. Kizpur punirangana. Isussha: Puniriyspa, nuwtanda. Isustana. Mapiyngtsa; tárangeiya.

⁵¹⁻⁵² Táyaru, wipunashish wanurishsha zarukamchu, kambusuru zanay ashirangiya. Wipunashsha nda izuurasha Isusoo mangoonarangsin, mang' zuu ashiranganaya. Napa: Isus zameetpa tputs milo maritarangitaa, ashiritaa wipunashsha nda mangoonarangana. Mang' ndunarpaz ashirangana.

(*Matiwa 14.34-36*)

⁵³ Ashiriya, minush zari yusur musaatssha kíteersin, tsap Kinísaritash sura anush matayarangana. ⁵⁴ Káreeranlltisin, tputs Isusoo natstayarusin, Isus piytanda, táta táta ashirangana. ⁵⁵ Kas yutamaa wayanllamarish kuyarandsin, Isusush yaraani atusin, Isusupsha yushindarangana. Uwsha Isus kas yutamaa yararangiya. ⁵⁶ Yapiri Isus xiyrangu ambtam tachitarangana. Yaktap

naaku, chapungup naaku, ipuspita naaku, ambtam tachitarangana. Uru paxanxshishush kas yutamaa wayarangitamanaya. Kas yutamsha: Isusoo, shiyaa kamareetstaatish patatkachuri, nuwaa yarachpasha, tárangana. Táyarusin, Isusootssha wamarree patateersin yararanganaya.

Ashiri yuwaa Isus kungumun naatarangu anoo kamaneena.

7

*Mishat, yuwaa Isus mangeetsich nda tayutari-tamaam tayaspatarangu anoo kamanchintspa
(Matiwa 15.1-20)*

¹ Minush zar Móysispaniri wirkar kamanimapan Irusarinush káyashinusin, Parísiypanshuchpa týayspatash ipuneersin, kusarangana.
² Kuseersin, Isus wipunash nda kaapa wanasisr kuxeersin katungarangana anoo parangana. ³ Sirútama Utaáshuch zitaminarini yapstarangusin, mangutari mangeetsich nda tayutaritaruneepa atusin uru izuuru kuxeersin katungtaranaya. Parísiypanshuch tputs misisinasha, itaru Utaáshuchtamta ichinguru anootsimari mang chinarangana.
⁴ Paxanxkatssin, kanapkatssin, izuuru kuxeersin, katungarangana. Kupartamaam zapantam kamachtarangana. Mangawaa kupartaata, ngusambaatstam kupartaata, ngusambaatstam chumbeepimashee kupartaata sheersin, wanasisr katungtaranaya. ⁵ Ashirucha, Parísiypanshuchsha Isusoo masharangana; ¿Ipunshish mayaamshta nda zitaminarini Utaáshuchirini tayaspatarangu

nda anoo kuk payukanaya? tárange. ¿Mayaamshta uw nda izuuru kuxeersin katungkanaya? tárangana. ⁶ Isussha: Siy uru yanuru Apanlee kuk payuksa; itsinsaru nda chinaksa. Apanll kamanimapani, Isáysarini sirútamasa yandayaru, siyashchee wasina kamanirangya. Zurku, tárange;

In tputs kukpatari mangu Apanlee tsiyatkana; tárange. Itaru, Apanlee nda chinakana. Nda mangoonkana. ⁷ Mangutari Apanlee mangoonaktana atanaya. Waanaatstamari chínash tayapstakanawa; tárangimanda Isáysarini siyashcheetsi. ⁸ Siy Apanlee kamachtamarini kapeeteerus, tputseetsimarissha kuk payuksa. ⁹ ¿Tamaysha zitaminaatsinaasha kuk kis payuksa; itaru Apanleetssha kuk nda payuksa? ¹⁰ Mishat, Apanll Móysisarineetsi tuyandaku, tárange;

Apareetsis wanasis ksutangtsa.* Aneereetstamtish wanasis ksutangtamtsa. Itaru, tputs wapareetsi, wanireetsi yutarit tsiyatku anumand kizpur tsipatspatari wanimaaam waritariya; átcha Apanlee; tárange Móysisarini. ¹¹ Tárangitaa, siysa apareetsis, aneereetstamtis istamaam nda chinaksa. Napa: siysa kurikireetsis Apanleem ichinguru wayakus, anootssha kurik wayampancha átus, ísamatssa. ¹² Ashkachus, apareetsis, ¿Tamaree nuw shiyaa istachi? ¿Watam kurikireetsi wayaranginawa? átssa. ¹³ Atutischa Apanlee kuk kapeetaksa. Itaru, zitaminaa kuk kis payuksa. Siy zapan

* **7:10** Nishuri yuwartatam Tashitungarangu 20.12 átu atitamta.

yutarit tayaspataksa tputseetsi; tárangiya Isusu.

¹⁴ Isus minootssha tputs ichingurootssin kuru-zurangiya. Nuwaa kuki mazinayarus, mangoo-nangtsa; táyaru, tayapstarangiya.

¹⁵ Tsarunpat kiseeruch katungkich anoo nda mangishich tayutaritkiya. Itaru, yuw yutarit mangishich chinakich ancha chiya a tayutaritkiya. ¹⁶ Ashiri tputs mangoonamaam zandkusin, wits mazinachinllinpa; tárangiya.

¹⁷⁻¹⁹ Táyaru, tputsee kasayaranllu, wipunashpatamsha pangusish pshturangiya. Pshtuyarusin, wipunashsha masharangiyi; ¿Katungtsi amarangpasha? tárangana. Isussha: ¿Washa siy nda mangoonkis? tárangu. Katungats watam tputush chik pshtuyaru, sheeru yusur arang shitungkuwa. An tputsee mang' yutaritkeeja; watam nda mangishich pshtukuwa. Ashiriya, katungtsina ichinguru waritariya. ²⁰ Itaru, mangishich chinakich ancha chiya a tayutaritkiya, tárangiya. ²¹ Ashiriya, chiya a tayutaritku anoo kamanchintspa. Yutaritshishee chinachinaw ashkuch, yutarit taakchi. Ancha kizpur yutaritaya. Kizaa imbangartamaam yutaritcha; misha tputsee msangeeru pachakuch; misha shuchimaam; ²² misha tputsingaz maachiri támarakuch; misha ngichimaam; misha tputspata yutarit patatamaam; misha chaanaatstamari kasiru taamaam; misha tputsee mangutari tamapingakuch; misha tputsee yutarit tsiyatamaam; misha tputs mangsharit taaku yutarittamcha; an ichinguru yutaritcha. ²³ Ashiriya, yutarit mangishich chinakich an

chiyaa tayutaritkiya, tárangeiya Isusu.

Ashiri Isus yutaritshishee kamanirangu anoo kamaneena.

*Mishat, yuwaa arapich kiz Isusoo
mangoonarangu anoo kamanchintspa*
(Matiwa 15.21-28)

²⁴ Minush zari Isus Kinísaritaa tsap kasayaru, Tírshuchish tsap kuseeramchu, xiytaramach ashirangiya. Anush tputsush pang' taarsheem pshturangitaa, Tputs nuwaa yasarundama atitaa, tputssha nda zapish yasarangana. ²⁵⁻²⁶ Kizsha istapanda átu kusarangitamta. An kiz Utaáshuchimunaja. Síro-fenisschuchish nllurtama. An kiz wip kizataa yashingumuncha. Ashiri tsiyatssee mazinayaru, Isusush kuskamchu, watsush timuchta ashirangiya. Isusootssha: Ichee, nuw ipari yashing'cha. Ipareetsi yashingurini tchiyangi; tárange, ²⁷ Isussha: Xamachi, Utaáshuchetsima izuuru istachimasima. Antaati nuw Utaáshucheeem nllurapaz watungash itutseeruri, shiyaam tumuzeempaz ashiruri panacheezi, tárangeiya. ²⁸ Kizsha: Ashiritaataya, nuw tumuzpaz ashiruri taakuri, ashiritaat katushimunzitaa pananda pakchitaaya. Pakchitaa ipareetsi istanda, tárangeiya. ²⁹ Isussha kizaa: Shiy waptatcha tsiyatarangish, ashiri istachinllpa. Pangipish kanapungcha, watam yashing' shitungeenlluwa iparshish; tárangeiya Isusu. ³⁰ Kizsha pangusip kanapurangu, wipaa parangiyaa. Maashimun tamoo ashirangu, yashingoo tashitungam parangiyaa.

³¹ Isussha Tírosh tsap káyashinu, Sitónaa tsap iturpiyaru, musush Galileyash kusarangiya. Apus zapanparee maarangiya. Zapishsha Tikáporsush tsap kusarangiya. ³² Anush tputs mitsshartaa Isusup machtarangana; antam tputs makukshimuna. Kuwiptish ptatangi; mang, tárangeya wamkuri Isusootsi. ³³ Isussha tputsee mitsshartaa waani piyam macheeru, witsush patat ashirangiya. Uwimuna kawacheeru, tputsee waneepoo patatarangiya. ³⁴ Kanindapsha napeeru, Ipata, tárangeya. Itaru, iyashuch k'kini: Shuringi atiniya, tárangeya. ³⁵ Wits mazinarangshita. Waneep mureerangiya; wanasisrsha tsiyatarangiya. ³⁶ Isussha waneerangiya; Tputsee nllitarita kamaniyspa; tárangeya. Kapung, tárangitaa, itaru uwshtisin aranganash kamanta kamanta ashirangana. ³⁷ Tputssha anoo mazinayarusin, kapung punirustarangana. Isus ichinguru wanasisri yarkiya. Napa mitsshartawaa yarkuwa; napa mazinakshita. Mishat, makuksheewaatstaata yarkitamta; tsiyatakshita, tárangana.

Ashiri kamaneena yuwaa Isus tputsee yararangu anootsi.

8

*Mishat, yuwaa Isus yusur tputsee ipunpunar milo martarangu anoo kamanchintspa
(Matiwa 15.32-39)*

¹ Anpuru yusursha tputs zapani shani-yarangsin, katungats pshatarangu. Ashiri Isussha wipunashee kuruzeeru, ²⁻³ Tputsee ndaturi

katungkuru zanganimaam zandkeezi, tárangiya. Ngootsishsha marizimun itsipachshapsinaya, watam na tuchip zari nda katungaranganawa; tárangiya. Tputs arap taarusin,⁴ wipunashsha: Nish pangus nduni, nish mzats nduntamcha. ¿Tamayareezich maritchich? ¿Yapeeja yachich? tárangana.⁵ Isussha: ¿Wanip pang taara? Wipunashsha: Tsimbun matayaru taariya, tárangiya.

⁶ Isussha tputsee: Tsapush k'xinangints; táyaru, pangaa tsimbun matayaru yáyaru, Apanllpat tsiyatarangiya. Apaa, anumand na wapparee táyaru, pangaa tupta tupta tupta sheeru, wipunasheem panarangiya. Wipunashsha tputseem panata panata ashirangana.⁷ Kayupichsha pakcheewa tsimbunand yarangitamta. Isus Apaa, wapparee; táyaru, wipunasheemtam panayaru, tputseem maritangints; tárangiya.⁸ Panayarusin, tputsshha katungeersin, tazazartarangana. Katungeersin, kawapayarusin, tsumb tsimbun matayaru katuchirangiya.⁹ Tputs kamuz ipunpunarpri mil katungaranganaya.¹⁰ Ashiri Isus: Siy pangipis kanapungtsa, táyaru, wipunashpa kanush zaruyarusin, tsap sura Tármanotap kítarangana.

Ashiri yuwaa Isus tputsee yusur martarangu anoo kamaneena.

Mishat, yuwaa Parísiypanshuch tputs Isusoo mangoonamaam nda zandarangana anoo kamanchintspa

(Matiwa 16.1-12)

¹¹ Anpurtam Parísiypanshuch týayaspataš Isusoo yacharangana. Mangu yachamaam: ¿Kamapari Apanlleesha shiy Apanllee wizpuririni yámandachsha? pangpani; tárangana. ¹² Isussha tsiyantayaru, ¿Mayaama Apanllee wizpuririnee yámandangcha átssa? Apanllee wizpuririni siy pangcheezis ndambari. Zurkutana siyaa táschina, tárangu. ¹³ Támbeeranllu kasarangiya. Wapitam yusur Isus kanush zaruyarusin, wipunashpa arachich kítarangana.

¹⁴ Itaru, Isus wipunash botosh pangaa yamaam mbizarangana. Minamari pangaa payurangana kanushu. ¹⁵ Isussha waneeku, Paptsa; Parísiypanshuch tputs tpootshishirinee; misha Herodesarineetstam tpootshishirinee paptsa siya; tárangya. ¹⁶ Wipunashsha waanpatatin tsiyatkusin, ¿Mayaamaja iyaa át? ¿Pangaa mbizarangini ndush anumandpa atiya? tárangana. ¹⁷ Isussha wipunashee mazinayaru, ¿Mayaama pangarini nduni átssa? ¿Tamash nda yasasa? ¿Tamash nda mangoonaksa? ¿mangis ndun ashkis? tárangu. ¹⁸ ¿Kachis taaritaa nda pakis? ¿Mazinaktaatis nda mangoonkis? ¹⁹ Pangaa zameetpata tatapta tatapta tatapta sheeruri, tputs zameetpata mil maritarangis, katungeersin, ¿wanip tsumboo yarangsa katuchimawaatsi? tárangu, wipunashsha: Arangtach tsimbun matayaru yaranginiya, tárangana. ²⁰ Isussha; Pangaa tsimbun matayaru tatapta tatapta tatapta sheeruri, tputseema ipunpunar mil maritarangis. ¿Wanip tsumboo yarangsa katuchimawaatsi? tárangu, wipunashsha: Tsimbun matayaru

yaranginiya, tárangana. ²¹ Isussha: ¿Ashirangtaati wand nda mangoonkis siya? ¿Antaati katungtsee tsiyatkeez? Tputs tpootshirini aturi, ngichizpa kiseeru tayaspatakana anoo siyaa áti; tárangiya.

²² Isus wipunashpa ipuneersin Betsáyanap naatarangana. Anushsha kusaramchu, tputs wach mchusaa Isusup machtarangana. Mchusaa ptatangi, tárangana. ²³ Isussha mchusaa itateeru, yakta shitungarangana. Isus mchusash wach kawacheeru, patateeru, ¿Maactaa paktaatish? tárangiya. ²⁴ Mchussha napta ashku, Yasinpaz ashru paktana, itaru tputsparee, watam naakanawa; tárangiya. ²⁵ Isussha yusur wchush patat ashirangu, mchussha nap ashku, wach ichinguru yaramshita kamiransha parang. ²⁶ Isussha: Pangipish kanapungcha; yaktash pshturinllpa; tárangiya.

Ashiri yuwaan Isus wipunashee mangoona-maam waneerangu anoo kamaneena.

*Mishat, yuwaan Isus wipunash Isusoo mangoonarangana anoo kamanchintspa
(Matiwa 16.13-20; Lukasa 9.18-21)*

²⁷ Minush zari Isus wipunashpa ipuneersin, tsap sur Sesár-Felipi annungiri xiyranganaya. Naantachu Isussha wipunashee: ¿Piyartach tputs nuwaa amkanaya? mang, tárangiya.

²⁸ Wipunashsha: Ashpatam tputs shiyaa Wangari-neezuwa ichumampani támeeeshiniwa átssinch, tárangu. Itaru, ashpatam shiyaa zitaminazuwa Apanllee kuk kamanimapaneezuwa támeeeshiniwa atanaya. Ashpatam shiyaa Elíyasarinparee yusur kanapeeshiniwa átssinch shiyaatsi; mang,

tárangiya wipunashiya. ²⁹ Isussha: Itaru, ¿siystawa; nuwaa chakand átssa? átu, Pitorsha: Shiy Apanlltishcha Ipusamarini; mang tárangiya. ³⁰ Itaru, Isus kamapshimaam kamachtarangiya.

(Matiwa 16.21-28; Lukasa 9.22-27)

³¹ Anumunsha, waanaatsi watsipun kamanirangiya. Tputseem kinarangitaati, ashiritaa kiyung kachiychina; tárangu. Iyashuch kurakarini nuwaa izuurisha ngatchinllinaya. Iyashuch apanllpan urkari nuwaa natsachapandanaya. Móysispaniri wirkar kamanimapan nuwaa ngatachpasinaya. Nuwaa pachakchitaateesinaya, nuwaa Apari zar tuchparinshini ituyamachindanaya, mang Isus tárangiya wipunasheetsi. ³² Wazareetsi kamanirangiya wipunasheetsi. Pitorsha Isusoo tasaseeru, nambarangiya. ³³ Isus natpunuyaru, wipunashee ichinguru pakeeru, Pitoroo nambarangiya. ¿Mayaamsha yashing' tamapari ashiru nuwaa tamundaksha? tárangu. Shiy tputs ashiritam chinaksha. Itaru, yuwaan Apanll chinaku anoo shiy nda chinaksha; tárangiya.

³⁴ Anumunshacha tputseetstam, misha wipunasheetstam ichinguru kuruzurangu, Nuwash tachitamaam zandkus, saanaatsi taarashis chinarintspa. Nuwamand kamini tsipaneetsis pchindintspa; nuwash izuuru tchitangasindama; tárangu. ³⁵ Tputs waanaatsi tapachindaku, Yashingup naachiya; itaru, nuwamun kamini watsipunootstaa nda pachindku, nuwsha tapachindachima. ³⁶ Mishat, tputs maachi ichinguru payukinaari, ¿antaati anpataja kamungumaam taar? nduni. Tsipakchu,

Yashingup naachiya. ³⁷ ¿Antaati Apanllish pshtumaam kurikpat pshtucheeja? ndambari.

³⁸ Nish tsapurunasush Apanllee kuk kapeetkus, nuwaa pazikus, nuwsha siyaatstam tpazchintspa, watam tputseem kinaranginawa. Yusur kuskachuri, Aparpati wasundururpat ichinguruni kuschina. Anush nuwsha tputsee tpazchina; tárangeya Isusu.

9

¹ Nuwaa kuki mazinangtsa. Siy naturi nuwaa mazinaktaatis, itaru ndatuma tsiparus, ashpatamtis Apanllee taáraph pangachpasa; Apanllee wizpuririni pangatssa; tuwasiningamarineetsi punirustatssa; mang, tárangeya Isusu.

(*Matiwa 17.1-13; Lukasa 9.28-36*)

² Anumunsha minam matayaru maats Isus Pitorpat, Wangpat, Sandeekurinpatini machip kárirangana. Ashpamari machtayaru Isussha wachu nllitaritamsha kinarangu, ³ mang wamarsha kurakurtaru mbursheerangiyi. Kiz káchaktat ¿tamaree ashiru mburshirini taach? Pinasakiya. ⁴ Zitamarini mang anshu tsimbun yakarangu; Móysisarini, misha Elíyasarini yakarangana. Isuspat mang tsiyatarangana.

⁵ Pitorsha mang: Mayistoroo mang tárange. Washunandari nish taakuni, wanasiрия. Nuw tuchip tambtachima; neetsiri taapani, ichee, tárange. Min shiyaam tambtachima, misha Móysisarineempa, misha Elíyasarineempa; támbap ashirangiyi Pitoru. ⁶ Itaru, watam kizpur puniksin, Pitor mangush ¿ameecheezi tsiyatkuri?

átu támbap ashirangiya. ⁷ Msassha kuseeru, yambutatara mang ashirangiya. Msasish mang kimarangu; Isusoo nuw shiyaa ipartana. Ksumish chinaktana. Isusootsiri kuk mazinangtsa; mang, tárangeiya. ⁸ Wipunashsha nap ashku, tputs nduni. Mang Isusootsimsha parangana.

⁹ Machip karuwkatssin, Isussha wipunasheetsi: Siy parangis anoo kamanintspa; mang, tárange. Nuwsha Apanlltaati tputseem kinarangina. Itaru, nuw tsipakchuri, nuw támkachuri, siysa anush tputsee kamanimaam waritaksa; tárangeiya Isusu. ¹⁰ Ashiriya, uwshhtisin Isus wipunash kamapshirangana. Itaru, waanpatatshtisin tsiyatkusin, Isus: Nuw tsipayaruri, támchima; ¿mayaatsi át? tárangeana.

¹¹ Ashiri wipunashsha Isusoo mashirangana: Móysispaniri wirkar kamanimapán: Eliýasarinpaz ashiru uru kuskamchu, Apanllshapa Ipusamarini kuschiya átssincha, tárangeana. ¹²⁻¹³ Isussha: Annaa zurkusin, tárangeana, tárange. Apanll: Ipari ndatumá tsapurunasush zanganchuri, Eliýasarinpaz ashiru zanganchimasima, tárangeiya. Ashiritam Eliýasarinpaz ashiru tputs na kuseenlliya. Anootsiri sing tumineenllinaya. Ashiri anoo tputs nat-sarangusin pacharangana; tárangeiya Isusu. Átu an Wangarineetsi, tárangeiya. Isussha: Apanll kuk ateeja; Ipari tputseem kinakchu, tputstisín yutarit tsiyateersin, kiyung yachachinllinaya; Apanll kuk atuwa, tárangeiya Isusu.

Ashiri yuwaa Isus wipunash Isusoo mangoonarangana anoo kamaneena.

*Mishat, yuwaa Isus nllurash yashingoo tashitungarangu anoo kamanchintspa
(Matiwa 17.14-23; Lukasa 9.37-45)*

¹⁴ Ashirucha, machish karuweersin, wipunaship naateersin, tputsee zapan parangana. Wipunashpa Móysispaniri wirkar kamanimapanpata nambaptar ashirangana. ¹⁵ Tputssha Isusoo pakeersin, punirustambach ashirangana. Isusungaz iriputaranll ashirangsin, ¿Tamarimta, ichee? ¿Kuseeramchish shiya? tárangana. ¹⁶ Isussha wipunasheetsi: ¿Maya tsiyatakса saanpatata? tárangeiya.

¹⁷ Tputssha yámarangu, Ichee; Ipareetsi yaramaam yushindarangina. Ipari makukishcha, watam yashinguwa, tárange. ¹⁸ Yashing ipareetsi kiyung yachakchu, uru tsapush tupantsakchu, waris kukish chpukat chpukat ashku, wanassha katsats katsats shitamach ashku ipari. Mamatangamach ashkiya. Ipunsheetsish yashingo tchiyangi táyaruri, ipunshish xapoorangana, tárangeiya tputsi.

¹⁹ Isussha mang: Nuwaa mangoonamaam ngatakса, mang tárange. Siyaam nguti kiyung kachiykina. Ashtaa, iparish yamashini; mang, tárangeiya Isusu.

²⁰ Tputssha Isusush nlluraa kamuz yamayashinu yushindarangana. Yashingsha Isusoo pakeeru nlluraatsi kasirangu, nllursha tujm taramach ashirangiya. Wanuts tatata shitaramach kuripungakatara kuripungakatara ashirangiya. Warissha kukush chpukat chpukat shitar ashirangiya. ²¹ Isussha nlluraatsi wapar ¿Ashin zutaranga? tárangeiya.

Waparsha: nllurtamasa chtarangiya tárange. ²² Nlluraa yashing' pachamaam zapan yacharangiya. Sumasush kapeet, kungush kapeet ashirangiya. Shiy yasarinaareesha yaramaam nayaningandama, tárange. ²³ Isussha: ¿Mayaamsha yasarinaareesha yarangandama átsha nuwaatsi? Shiy nuwamun mangish tatkinaareesha xapoomaam wanindaja, tárange. ²⁴ Nllursha wapar kizpur tsiyatku, Ichee, mangoonamana mangoonaktana. Mangoonamaam istanganda; tárange. ²⁵ Tputs zapan mikeeru kusta kusta kusta ashirangsin, Isussha yashingoo zapan nambarangiya. Yashingoo, ¿mayaamsha shiy ashiksha? Mitsshariittishcha. Makukishtishcha. Shtungangi átana. Ayamtaati nllurash pshtucheezish ndambari, tárange Isusu yashingootsi.

²⁶ Nllursha kizpur ay táyaru, tatata tatata shitaru, yashingsha shitungarangiya. Nllursha tsipari ashiru tamuramach ashirangu, tputssha: Tsipayanllchimanda, tárangana. ²⁷ Isussha nlluraa uw putayaru, nllursha chiyzarangiya. Yareeru kasarangiya.

²⁸ Minupsha pangus Isus pshtuyaru, wipunashinand shaniyarsin, wipunashsha masharangiya. Iy yashingoo tashitungamaam yacharanguni, itaru xapooranginiya. ¿Tamashta ashkini? tárange. ²⁹ Isussha: Yashing ashpatam mbam tashitungamaama. Apanllpa ndunnaa tsiyatkuch, yashingoo tashitungamaam pinasakchi, tárange.

³⁰ Anamunsha, anush káyaru, Kapárnáwap

naatarangiya. Apus wanipamasaja maarangiya. Wipunashee tayaspatapi átu apinll naatarangana. Tputs yasarusinapa átu, yaktash nda naparangiya.³¹ Isus wipunashee tayaspatarangu; Nuw Apanlltaati tputseem kinaranguri, ashtaa tputs nuwaa tamapingayarusin, putayarusin, nuwaa pachachapsinaya. Ashiritaa nuwsha tuchip zari támchma, ákatach ashirangiya.³² Wipunashsha mazinarangitaatssin, nda mangoonarangana. Pazirangusin, nda Isusoo mashirangana manga.

Ashiriya, yuwaa Isus nlluraa yararangu anoo kamaneena.

Mishat, yuwaa Isus kizpur taamaam tayas-patarangu anoo kamanchintspa
(Matiwa 18.1-5; Lukasa 9.46-48)

33-34 Ashiri naantaatssin, zapish Kapárnáwaa watsirkachu, wipunashsha: ¿Chakaja nish kasiru taar? waanpatatin, tárangana. Kuseersin, pangusush pshtuyarusin, Isussha: ¿Ngootish naantachu saanpata mayaatssha tsiyatarangsa? tárange. Isussha wipunash nda yámkusin,
35 wipunashee 12: Naani, tsiyatpani týaru, shaniyeersin, Isussha: Mazinangantsa, tputs m'chach' tamatarpari ashiru nuwash tachitkachu, ashiri an nuwash kizpuritam taachiya, tárange.

36 Nlluraatssha pakchee naani týaru, tuxiykeerangiya upusshu. Pachipeeru,³⁷ Tputs nlluraa pakchi nuwamun kamini chinakuch, ashiri nuwaa chinachtamtaya, tárange. Mishat,

nuwaa chinakuch, Apanlleetstam aranginasha chinachchi, tárangiya.

(Lukasa 9.48-50)

³⁸ Wangsha, Ichée, tputs shiyamun wizpurirish yashingoo tchiyarangu anoo parangina; tárangu. ¿Mayaama shiy ashiksha? Antaati shiy iyashcheezish; watsta; tágashinina, tárangiya Wanga. ³⁹ Isussha mang: Watsta tárinllpa. Tputs nuwamun sur yashingoo tashitungakchu, ¿antaati nuwaa yutarit tsiyatcheeja? ⁴⁰ ¿Antaati tputs iyaa istaku kundaraja? mang, tárangiya Isusu. ⁴¹ Nuw siyaa itsinsaru atina: Nllitarit tputs shiyaam yaschinlla, mangush chinaku, in tputs Apanlee Ipusamarini yasati átu, yásku an ashku anoo Apanll kapung istachitamta; tárangiya.

(Matiwa 18.6-9; Lukasa 17.1-2)

⁴² Mishat, tputs Apanlee mangoonamana mangoonkita, itaru yashingchichsha anoo yutarit yaspatakchu, wayarpunshu samand kapunguw kásiyaruch, musash ipusunandush kapeetkachuch, wanimaam waritakcha, tárangiya Isusu.

⁴³⁻⁴⁴ Apaz kuwiptish yutaritshishee patatkachush, ashiriya kuweetsish turungcha. Turuyarush, kapeeteerush, minungichimsha Apanllish urutamari kis taachsha. An ashkush waritacha. Itaru, shiy xarashshee nda kapeetkush, shiy sumasush Yashingup naachsha. Urutamari anush kiyung kachiychiyytachsha; tárangiya Isusu. ⁴⁵⁻⁴⁶ Apaz k'tsiptish yutaritshiship naakush, ashiriya k'tseetsish turungcha. Minungichimsha kutsish Apanllish urutamari kis taachsha. Itaru, shiy nda xarashshee kapeetkush,

Apanll sumasish shiyya kapeetchiya Yashingpiya.
47 Apaz kchiptish yutaritshishee napkush, ashiriya kcheetsish yuxungcha. Yuxeerush minungichichsha kachish anparee Apanllish pstuchsha. An waritariya. Itaru, xarashshee ndunnaa kapeetkush, Apanll sumasish shiyya kapeetchiya Yashingpiya. **48** Anush uru kindutakpaz ashirush kiyung kachiyachsha. Sumas ztazcheeja, ndambari, tárangiya Isusu.
49-50 Nuw kuki yum tamapari ashiru kumaku itaru yarkiya. Tputsee ichinguru yachamaam taariya. Ndunnaa nuw kuki mangush kumakpaz ashiru, ashiri yashingupsha sumasush kapeetkachu, watstamamari muchchiya.* Apaz yum misangapsheeru, ¿maypataja saratchich? Ashiriya, nuwaa kuki payungtsa; saanpatatis mapiyrus taangtsa, tárangiya Isusu.

Yuwaa Isus waanaatsi wipunashi waneerangu anoo kamaneena.

10

Mishat, yuwaa Isus kamuzini kizaa nda kasamaam tayaspatarangu anoo kamanchintspa (Matiwa 19.1-12)

1 Minush zar Isus Galileyaa kasayaru, tsap Utaá sura amb naatarangiya. Ortagaa kung kitarangiya. Yusur tputs zapan shaniyarangana. Isussha tayaspatattar ashirangiya.

2 Parísiypanshuch tputs kuseersin, Isusoo imamarmpamaam masharangana; Tputs wizanllee kasakchu, ¿Waritacheeja? ¿Shiy amaksha?

* **9:49-50** 2 Utaáchich kuraka 2.20 tsiyatsis nipta tatsamooru taaritamta.

tárangana. ³ Isussha: ¿Móysisarini kamachtarangu amaranga? tárangu manga. ⁴ Parísiypanshuchsha:

Tputs, Izanlli kasachima átu, kirakaa kasamaam tuyandachiya. Wizanlleem kirakaa panayaru, izuurumamari kizaa kapeetchiya;* tárangiya Móysisarini; tárangana.

⁵ Isussha: Siy wanasis taamaam ngatarangus, ashirucha Móysisarini yandarangasha, tárangu,

⁶ Itaru, Apanll tsapoo tinamaam iwapayaru, tputseemshat tinarangiya. Chtaru kamuzaatsima tinarangu, anumunshat wipunasheemsha kizaatssha tinarangitamta.* ⁷ Ashirucha, tputssha kamuz uru waparee, wanireetstam kasayaru, izuuru wizanllpatamarisha minumaripaz nutsas ashirusin taachinlinaya. ⁸ Ashkachu tsimbunataa tputs minamaripaz nutsas ashiru taachiya. Ashiriya, ndusha tsimbun tputsi; minumaripaz ashiru taachiya.* ⁹ Apanllsha kamuz wizanllpat minumarishat tputs ínarangu, ¿tamaree wizanlee kasach? Mishat, tputsee wizanlli itutsimaam yutarittamcha;* tárangiya Isusu.

¹⁰ Pangusush pshtuyarusin, wipunashsha: ¿Kamuzich izanleetsich kasakuch yutaritaja átish? tárangana. ¹¹ Isussha: Mazinangcha: tputs wizanlee kasayaru, nllitaritaa yamakchu, yutaritsha

* **10:4** Nishuri yuwartatam Tayusima 24.1-4 átu atitamta; misha Matiwa 5.31 tsiyatsis nipta tatsamooru taaritamta. * **10:6**

Nishuri yuwartatam Apanll chtarangu 1.27 átu atitamta; misha Apanll chtarangu 5.2 tsiyatsis nipta tatsamooru taaritamta.

* **10:8** Nishuri yuwartatam Apanll chtarangu 2.24 átu atitamta.

* **10:9** Malakiyasa 2.16 tsiyatsis nipta tatsamooru taaritamta.

taakiya; yuwaa ichtaru kasarangu anoo tayutaritkiya, tárangeiya Isusu. ¹² Kizsha wazaranlee kasyaru, kamuzaa nllitaritaa zaranllku, yutarittam taakiya, tárangeiya.

Watamcha Isus kizaa nda kasamaam tayaspatarangu anu.

Mishat, yuwaa Isus nlluraa chinarangu anoo kamanchintspa

(Matiwa 19.13-15; Lukasa 18.15-17)

¹³ Mishat, Isusush nlluraa yushindarangana. Isus nlluraa pachipap atusin kusaranganaya. Itaru, Isussha wipunash tárangeyanaya; Watsta. ¿Mayaamshta Isusoo muntaksa? tárangeyanaya. ¹⁴ Isus anoo mazinayaru, tsiyantarangiya. Nuwash waani nlluraa kuspana; zanganintspa, tárangeiya. Tputs nllurpaz ashiru nuwaa chinaku, anoo Apari kizpur chinakiya. Ancha Apanll tiptsiriya. ¹⁵ Ashiriya, tputs ndunnaa nllur tamapari ashiru Apanlee chinaku, ayamtaati Apanllish pshtuchéeja, ndambaree; tárangeiya. ¹⁶ Sheeru, nlluraatssin yamayaru, pachipeeru, Shiyyaa Apanll chinakiya týaru, nlluraam Waparpat tsiyatarangiya.

Yuwaa Isus nlluraa chinarangu anoo kama-neena.

Minootssha kamanchintspa; yuwaa Isus: Apanllish pshtumaam mbamcha tárange anootsi

(Matiwa 19.16-30; Lukasa 18.18-30)

¹⁷ Minush zari Isus Ortagush kung káyashinu naantachu, tputs iriptaranll timucheeru tsiyatarangiya. Ichee, shiy wanasiertishcha. ¿Apanlee taárash urutari payumaam tamaycheezi?

tárangu. ¹⁸ Isussha: ¿Mayaamsha shiy
wanasirtishcha nuwaa átsha? tárangu.
Apanllimaritcha wanasiriya, tárangiya. ¹⁹ Shiy
Apanllee kamachtamarini mazinakpasha.
Watam Apanll:

Ngutis tputsee pcharintspa.
Minpa kiz imbangartarintspa.
Maacheetsi shuchirintspa.
Tputsee mantsir tsiyatintspa. Tputsee ngich-
intspa.
Apareetsis wanasir ksutangtsa. Kuk payungtsa.
Aneereetstamtish wanasir ksutangtsa; kukoo
payungtamtsa;*

watam atuwa. ¿Anoo tamarangsha? mang,
tárangiya Isusu. ²⁰ Tputssha: Apanllee
kamachtamarini ichinguru payukuri, anpatari
wachinaranginawa, tárangiya. ²¹ Isussha
napku anoo tputs chinarangiya. Itaru,
shiyaam minum arangeem wand pshatakiya,
Isus tárangu, Mazinangcha; maachiritaatsish
paxanxeerush, tuchingeerush, pukireemsha
panangcha. Sheerush, nuwash tchitangandama.
Ashkachush, Apanllushsha shiyaam maachi
pshatacheeja, ndambaree; mang, tárangiya.
²² Itaru, tputssha maachtaa zapani payurangiya;
an tputs kurkirimuncha. Ashirucha, Isusoo kuk
mazinayaru, ngateeru, mang' mantsarangiya.

²³ Isussha wipunashee tasaseeru, Wirakuch
Apanllish pshtumaam mbamcha; mang, tárangiya

* **10:19** Nishuri yuwartatam Tashitungarangu 20.12-16 átu
atitamta.

Isusu. ²⁴ Wipunashsha Isusoo kuk mazinayarusin, ¿Tamakee ashik? tárangana. Isussha yusur: Nlluris, Apanllish pshtumaam mbamcha; tárangya. ²⁵ Mazinangantsa; Kameechu wanuts kapungu m'kushash wach pshtumaam pinasaku. Ashikpaz ashkiya wirakuch Apanllush pshtumaam aranganasha mbama; tárangya Isusu. ²⁶ Wipunashsha: Maya, ashkachinaariya ashiru, ¿tamayareezich kamungchich? tárangya. ²⁷ Isussha wipunashee napku, Chaanamuntari kamungumaam wanindaja; itaru Apanll chiaya tapachindachiya. Antaati Apanllina xaptareeja, nda; tárangya.

²⁸ Itaru, Pitorsha: Ichee, mazinangancha. Shiyaam kaminish maachiritaatsini kasarangtanicha mang táyaru, ²⁹ Isussha: Mazinangantsa; watsapunee kasakchu, zoonlleetstam, wizareetstam, wapareetstam, wanireetstam, wipaatstam, mazareetstam kasakchu, nuwangaz kamini nuwash tachitku, ³⁰ tputs ashkinaari ashiru, Apanllinasha aranginasha na in istachiya. Yap xiuku amb ichinguru Apanll istachiya. Pangoomtampaz, zuwanlleemtampaz; wizareemtampaz wanireemtampaz; wipaamtampaz; mazareemtampaz, ashiritampaz ashiru panachiya; itaru kiyungupa kachiychinllinaya. Itaru, Apanllush watsapunu urutamari taachiya; mang, tárangya Isusu. ³¹ Mazinangantsa; Tputs nish tsapurunasish kizpuritaa taaku, itaru Apanllush kuskachu tsapush taachiya. Mishat, tputs nish nda kizpuritaa taaku, itaru Apanllush kizpur taachiya, mang tárangya Isusu.

Yuwaa Isus: Apanllish pshtumaam mbamcha, tárangu anoo kamaneena.

Mishat, yuwaai Isus waanaatsi watsipunu yusur kamanirangu anoo kamanchintspa
(Matiwa 20.17-19; Lukasa 18.31-34)

³² Isus Irusarinap arap naamachu, uwma yamazaru naatarangiya. Wipunashsha punirus-taatssin, nllitaritam tputs tachitarangusin, kizpur punirangana. Itaru, Isussha: Naanints tsiyatpani, tárangea wipunasheetsi 12. Yuwaa Irusarinshuch Isusoo ashtachinllina anoo kamanirangya. ³³ Na Irusarinap naachiniya, tárangea. Nuwaa tputseem kinarangitaati kiyung yachchinllinaya. Tputssha nuwaa tamapingachiya. Sheeru, Apanlee kuk tayaspataaru antam, misha apanllpantaa urkari, nuwaa tupchachindanaya. Tunarip nuwaa machtayarusin, ³⁴ uwshtisin waana much naach naach sheersin, misha nuwamun kawachta shitarusin, pachachindanaya nuwaatsi. Itaru, zari tuchpashu yusur támchima; Isus tárangasha wipunasheetsi.

Ashiri yuwaai Isus waanaatsi watsipun yusur kamanirangu anoo kamaneena.

Minootssha kamanchintspa; yuwaai Sandeekurini, misha Wang kurakaam kinamaam zandarangana anootsi
(Matiwa 20.20-28)

³⁵ Sípitiyurini wipa Sandeekurini, misha Wanga Isusush kuseersin, Ichee, na shiyya tamundachinipa. Shiynaa ngatinllpa, ichee; tárangea. ³⁶ Isussha: ¿Maya zandaksa?

tárangu, ³⁷ uwsha: Yusur kuskachush, 'sinush kuskachush, zuwanlli shiyanungi mbazinungich kuxinku, nuwsha shiyanung mbutsutsunungich kuxinkachuri, iyaa kizpur kurakaam ínangasindama, tárangana. ³⁸ Isussha: Anoo shiy kaapa nda mangoonaksha. Nuw kizpur kiyung kachiychima. ¿Itaru, siy kiyung kachiyamaam ndusha ngatchis? tárangiya. ³⁹ Ashiri Sandeekurintam, Wangtam: Iyaam kiyung kachiyamaam waritachtamparee; ngatcheezini, ndambaree tárangana. Isussha: Zuraktishcha. Nuw tamaparina ashiru siy kiyung kachiychitampasa. ⁴⁰ Itaru, nuw siyaa tputsee kasiru ipusamaam pinasaktana. Apanll waana ipuschiya yuwaa zandku anootsi; tárangiya Isusu Sandeekootsi.

⁴¹ Isussha wipunash kuwiz iptaru an mazinazinaw ashirangsin, tsiyantaranganaya Sandeekurineetsi. ⁴² Itaru, Isussha wipunasheetssha: Na mazinangtsa; Siyamari kurakaris tamapari ashirus taarintspa. Siy tunaree tputs yassaksa. Kurak uru wamari kasiru taariya. Wamkursa kasiru taaku, tputsee zapani kamachtat kamachtat ashkana. ⁴³⁻⁴⁴ Itaru, siysa Apanllis tiptsiris shirintspa. Kasiru taamaam zandkus, ashiriya tputsee chinayarus istangtsa. M'chachpaz ashiru tputsee istakinaareesa, Apanllsha siyaa kis chinachiya, tárangiya. ⁴⁵ Napa nuw tputseem kinarangitaati tputsee istamaam nish tsapurunasush kusarangina. Antaati tputsee nuwaa istanda ateezi, nda. Nuw tsipakchuri, tputsee zapan yashingoo itutschima; tárangiya Isusu.

Ashiri yuwaa Isus wipunash kurakaam kinaamaam zandarangana anoo kamaneena.

*Mishat, yuwaa Isus Bártimiyoo, wach yararangu
anoo kamanchintspa*

(Matiwa 20.29-34; Lukasa 18.35-43)

⁴⁶ Ashiri Irusarinap naantaatssin, minush zari Isus wipunashpa tputs zapanpa yaktash Jericosh pshturangana. Arangeem shitungeersin, Bártimiy, Timíyu wipa, wach mchusaatsi, ngootsinung kuxinxinaw watungasheem kutataw parangana. ⁴⁷ Tputs Isus Násaretshuchi naanllpa atusin, Bártimiysha: Isusoo, istanda, watam Dapiyarinchichshawa átu, ⁴⁸ Tputssha mang nambarangu, ¿Mayaamsha tamundaksha? Zamachiysiha; tárangeiya. Itaru, Bártimiysha nda sambaytarangu, manga. Isusoo, istanda; tárangeiya. ⁴⁹ Isussa mazinayaru, Kuruzungints; táyaru, tputssha mchusaa: Mangish mantsarinllpa. Isus shiyaa kuruzkiya. Chiyzangi; pza pangatish, tárangeana. ⁵⁰ Bártimiysha wamaree yushta sheeranllu, chiyzata sheeranllu, Isusup naatarangiya. ⁵¹ Isussa: ¿Mayaamsha nuwaa kuruzuksha? ¿Tamanda átsha? átu, wach mchussha: Mayistoroo, kachi yaranda; nappi átana; mang, tárangeiya. ⁵² Isussa: Nuwamun mangish taturangush, ashiri shiyaa yareena. Naangsi; tárange, musásirisha napta ashirangya. Sheeru, ngootsush Isusush tachitarangya.

Watamcha tsiyatssis Bártimiyoo yararangu anu.

11

*Mishat, yuwaa Isus Irusarinush kusarangu
anoo kamanchintspa*

*(Matiwa 21.1-11; Lukasa 19.28-40; Wanga
12.12-19)*

¹ Isus Irusarinap naantachu, yaktash Betaniyaa maayaranllu, machish Olivash sura kusarangiy. Anush mang xiyartere ramchusin, Isussha wipunashee tsimbun kamachtarangiy. ² Siyma yamazayarus naangints; Isus tárangu. Yaktap taarip tasasaru amb naatssa. Pshtuyarus, burroo karupan tusisimaa pangatssa. Tapureerus, machtantsa. An burr tsasaritcha; anamun tputs kuxintareeja. ³ Itaru, tputs siyaa: ¿Mayaamsha chineetsi tapuriksa? atinaari ashiru, siysa: Watam iy kurakarini kamachtaranguwa; musásiritam tuwanpuchiya; tángtsa; tárangiy Isusu. ⁴ Uwshtisin naayarandsin, yaktash kuseersin, burroo karupana parangana. Pangusush shitungashinungi wachunung tusiseeru parangana; tapurirangana. ⁵ Tputssha xiyxeewu, ¿Tamaksa? ¿Mayaamsha tapuriksa burrootsi? tárangu, ⁶ uwshtisin: Watam iy kurakarini kamachtaranguwa, tárangana. Táyaru, tputssha: Ashiri machingsi táyarusin, ⁷ yamayashinusin, Isusush yushindarangana. Wipunashtisin wamaree tuwapimashee yusheersin, burrumun ush xanateersin, Isussha anumun kuxinarangiy. ⁸ Wamaree ngootsush muta muta sheersin, masharoo ngootsinung katupeersin, muta muta ashirangana. ⁹ Wazapan tputs shurangarsin, ashpatam tputs wasina

naatarangana, ashpatam tachitarangana;
zamangarangana.

Apaa, iyaa izuuru tapachindangcha.
Iyaam wanasiri taamaam istangcha, atiniya.
Shaana ipusamarineetsish iyaam zangankush
wanasiri napangcha.*

¹⁰ Watacha iy Utaáshuchini kurakarini.
Zitaminarini Dapiyarini tamapari ashiru kizpur
taachpa.

Ashiri naturi shiy iyaa tapachindangcha, Apaa;
yaseeksin, tárangana.

¹¹ Irusarinush kusarangu, Isussha Apanllush pang' pshtuyaru, ichinguru napta napta ashirangu. Sheeru, zari pshtututaranllu wipunashpa tsimbun matayaru, yaktapsha Betaniyap naataranganaya. Amb maaranganaya.

(*Matiwa 21.18-19*)

¹² Putamsha Isus wipunashpat yaktash Betaniyash káyarandsin, Isus mariz kayatachu, k'payunlee tatsummaa arap parangiya. ¹³ Itaru, k'payunllish puch kuseeru, wanusee napku, manustash parangu, watam yuwapas nda yusitaru anpas parangiya. ¹⁴ Ashiriya, Isussha yasinaa tsiyatku, Ayamtaati tputs shiaya katungchazinllinaja; tángiya. Wipunashsha Isusoo kuk mazinayarasin, nda mbizarangana.

(*Matiwa 21.12-17; Lukasa 19.45-48; Wanga 2.13-22*)

* **11:9** Nishuri yuwartatam Salmo 118.25-26 átu atitamta.

¹⁵ Támbeeranllu, Irusarinush pshtuyaru, Isus Apanllip pang' napkamchu pshturangiya. Anush tputs paxanxamapani zapan Apanllshumari pang' paxanxarangana. Isussha paxanxamapanetssha mang tashitungarangu, misarinee kapeet, urkiree yampabee misarineetstam kapeet, kuxinshisheetstam kapeet, tputseetstam uxinash makookoo paxanxarangu anootstam kapeet kapeet shitar ashirangya. ¹⁶ Tputssha Waparish pang' ngootseem wayarangana anush maacheetsi chiparsin nayintarana anoo pachindarangtamta. ¹⁷ Isussha tputsee waneerangya. Apanll yandamarini ateeja;

Nuwash pang'i kis nuwapa tsiyatchinllinaya.
 Mashkusin, nuwsha kis mazinachina.
 Anush kandoozeew ichingarusin nuwaa
 tsiyatchinllinaya;

átcha Apari. Itaru, siysa shuchimaamari chinaksa. ¿Antaati Apanll pang' washchireem taar?* mang, tárangya. ¹⁸ Utaáshuch apanllpan urkar, misha Móysispaniri wirkar kamanimapani anoo tsiyatssis mazinayarusin, ¿Tamayareezich pachayachich? tárangana. Itaru, ashpatamsha tputs Isusoo chinarangusin; ¡Tamaru tayaspataka! tárangana. Anumand Utaáshuchsha urkari Isusoo puniksin, pachamaam zandamana zandarangtaatssin, itaru natumasaam pachamaam xararanganaya.

* **11:17** Nishuri yuwartatam Isáysa 56.7 átu atitamta. Mishat, Jeremiyasa 2.11; Matiwa 21.13; Lukasa 19.46 tsiyatsis nipta tatsamooru taaritamta.

19 Ashiri tapitaranllu, Isus wipunashpa yaktash Irusarinush shitungeerandsin, arapinlltam maarangana.

(*Matiwa 21.20-22*)

20 Putamsha anshutam ngoots naattusin, k'payunll tsipamsha parangana. **21** Ashiriya, Pitorsha: Mayistoroo, napanganlla. Ayamtaati yusicheeja ndambaree, tárangish anu. Na tsiparangiya; tárangiya. **22-23** Isussa wipunasheetsi: ¿Mayaamshta Apapaa wizpuririni punirustaksa? Mazinangantsa; Apanllimun mangis tatkus, Apanll pinasachparee nda átus, nda punirustakus, nee tsapootstaa machee íwareetstaa: Naangi; musush chipuyangi tákchus, musush chipuyachparee, watam Apanllimun izuureesha mangis tatuksawa, mang, tárangiya. **24** Ashiriya, Apapaa mashkus, ndunnaari mangishis punirustakus, Apari izuuru istachapantsa; Isus waanaatsi wipunash tárangiya. **25-26** Tputs siyaa tayutaritkitaatiya, ashiritaa anoo tputsee natsarinllpa; napangtsa; k'kuzee yarangtsa. Ashkinaareesa, Apanllpat tsiyatkus, mangeetsis tachingchiya, tárangiya Isusu.

Ashiri yuwaa Isus Irusarinush kusarangu anoo kamaneena.

Mishat, kamanchintspa; yuwaa Utaáshuch tayaspatampanirini Isusoo ngatarangana anootsi
(*Matiwa 21.23-27; Lukasa 20.1-8*)

27 Isus wipunashpa Irusarinush kusarangu, Apanllush pang' naantaatssin, Utaáshuch apanllpan urkar, misha Móysispaniri wirkar kamanimapani Isusoo mashamaam naatarangana.

28 Isusoo mashirangana; ¿Tamam tputs shiyyaa

tayapstangi át? Tputsee sing tashitungarangush, ¿chak shiyya shingi táranlla? tárangana. ²⁹ Isussha: Nuwma siyaa mashchintspa. Nuwaa itsinsarus kamankinaareesa ashiru, nuwsha siyaa kamanchintspa; yuw nuwaa kamachtarangu anoo kamanchintspa, tárangeiya. ³⁰ ¿Chakaja Wangarineetsi ichumashini tárange? ¿Chakaja tayaspatashini, tárange? ¿Apanlleezuwa tárange? Nduntaati ashiru, ¿waantazuwa ashiranguwa? ¿Siy amaksa anootsi? siyma kamaningasindama; mang, tárangeiya Isusu.

³¹ Kurakshtisin arapinlltama naateersin, tsiyatarangana waanpatatina. Apanll Wangarineetsini kamachtarangiya atinaareeniya ashiru, Isussha iyaa; ¿Mayaamsha nda mangoonarangsa? táchparee iyaatsiya. ³² Itaru, Wangarini waana zandeeru tayaspatarangu atinaareeniya, yutarittamcha; waanpatatin tárangana. Watam tputs ichingurusin Wangarini Apanlee kuk kamanimapancha, tárangeanawa. ³³ Isusootssha: Yasareezini mang, tárangana. Isussha: ashiri yuw nuwaa kamachtarangu anoo nuw siyaa kamanchitamtazi, ndambari; mang tárangeiya.

12

(*Matiwa 21.33-46; Lukasa 20.9-19*)

¹ Tsiyatssis nllitarit kamanchintspa mangeetsis p'tsimaama; mang, tárange.

Tputs mazarish wanusee tatsumurangiya. Wanusee kizarun tamapari ashiru tatsumurangiya. Tatsumeeru, mzatsee tanda-punurangiya. Tandapunurangu, wanuseem

wayari tatsirapshisheem wayarangiya.
 Sheersha, íwaritam pangusee pangurangiya
 ksutamapaneema mazaree ichinguru
 ksutamaama. Sheersha, ksutamapaneetssha:
 Na siysa wanasisri ksutangtsa. Ashkachus,
 nuwsha wanasisri tuwapchintspa tyaru,
 nllitaritap tsap naatarangiya. Anush tsup zapan
 taarangiya. ² Wanuspas waritachu, muchchuree
 kamachtarangiya. An muchchur k'kuzee
 kamanimapanimuncha. Tsapunpi kuseerush,
 tputsee mashangcha; Iy paturunarini wanus
 p'sashinints tyacha; nuwaam ytancha áttanda
 tancha; mang, tarangiya.

³ Muchchursha k'kuzee kamanimapan
 kuseeru, tputssha muchchuree pzkoockatarusin,
 mangusha xunarusin waptam zanganirangana
 upaturunaripi. ⁴ Upaturunarsha anoo pakeeru,
 muchchuree misha zanganirangiya. Kuseeru,
 tputssha muchush kizpur tiya tiya shitar
 ashirangana. Kiyung yacharangu, ipazayaru,
 yusur xunartam, kusarangiya. ⁵ Yusur
 misha zanganirangiya. Kuskamchu, tputssha
 anoo pacharangshita. Upaturunarsha misha
 zanganta zanganta ashkitaa, tputsee ashpatam
 pzkoorangana; ashpatam pacharangana.

⁶ Ashiri upaturunari kuzizimun wipaatssha
 zanganirangiya. Minumtaatstaa kizpur chinaki
 anu kuskachu, chinachpasinaya; tyaru, mang
 wipaa zanganirangiya. ⁷ Itaru, wipsha kuseeru,
 tputssha: Papcha; paturun wip naanllpa;
 mang, tarangana. Iy paturunarini tsipakchu,
 wipsha iyaatsim kasiruneepa. Pachayaruni,

kaapeeteeni. Taringsi; mang táyarusin,⁸ wipaatssha putayarusin pachayarusin, chapungupshat pshiyreersin kapeetarangana.

⁹ Ashiriya, upaturunarsha zapishsha kuskachu, ¿tamacheeja? Maya; waana kuskachu, tputsee yutarita anootsi chingayaru, tputseetssha nllitarit: Siysa ksutangints, táchparee. Ashipaz ashchiya Apanlli, siyaa atashina. ¹⁰ Siysa Apanlee kuk natstakitaatis, itaru nda mangoonaksa. ¿Ni-taati Apanll kuk mangu át? nda. Waanaatsi Ipusamarini tsiyatku, tárangeiya;

Panguspan tputs panguksin, patumbchee wanasiwaatstaa yaksin, itaru; Annaa wanasireeja, tárangusin, kapeetaranganaya.

Ashiritaa, Apanllsha patumbchee ipuseeru, zurrampatari wanasiwayarangya.

Natunaa kizpur wanasi pashuchima, Apanll tárangeiya.

¹¹ Apanlltanda ashirangu atuni, ¿Tamaru Apanll kizpur wanasi ashiranga? atiniya.*

Ashikpaz ashiritam Apanleetstam Ipusamarini ngatachpasiniya;

yandaku, tárangeiya Dapiyarini, Isus tárangeiya.

¹² Ántaru anoo kurak mazinarangusin, mang kizpur tsiyantarangana. Isus iyaatspari atiya; tárangeana. ¿Isusoo tamayareezich putayachich? atitaatssin, tputsimun xarak'sin,

* **12:11** Nishuri yuwartatam Salmo 118.22-23 átu atitamta.

nda putaranganaya. Ashirucha, Isusoo kasarangusin, naatarangana.

Ashiri yuwaa Utaáshuch tayaspatampanirini Isusoo ngatarangana anoo kamaneena.

Mishat, yuwaa Parísiypanshuch tputs Isusoo imamarpani átu zapan masharangana Isusootsi anoo kamanchintspa

(*Matiwa 22.15-22; Lukasa 20.20-26*)

¹³ Kuraksha Parísiypanshuchee tputsi, misha Herodesarinchingichee tputsi kamachtarangana. ¿Kamapa tamantsachiya? Ashiri Isusoo imamar pangtsa; mang, tárangana tputseetsi. Tputssha ayu týayarusin, mang Isusup naatarangana. ¹⁴ Kuseeramchusin, Ichee, shiy itsinsarush uru kamaniksha, mang tamapingakchu, tárangana. Ngutish tputsee wach napkeezish. Nitaati shiy tputsee punirustakush, kamankeezish; nda. Shaana itsinsaru Apanlleetsiri kuk kamaniksha. Ashiri iyaa itsinsarush kamaningcha. ¿Tamaycheezini iya? ¿Romshucheeem urkari kurikee tuwapat tuwapat ashkachurini waritcheeja? ¿Amaksha shiya? mang, tárangana Isusootsi.

¹⁵ Isus itaru mangush tamapingayani atusin atanaya tárangeya. Ashiriya, Isussha: ¿Mayaama nuwaa yachaksa? Romshuchee urkir yátani. Napani, tárangeya. ¹⁶ Yáyarusin, yámandayarusin, Isussha: ¿Chak wani? ¿Chak yandamarini ini? ¿Chak tinaranga? tárangeya. Tamapingampansha presidenttanda týayarusin, ¹⁷ Isussha: Romshuch presidentee tinamarini waamatam panangcha; Apanllee wintsiri Apanlleemtam panangcha; týayru,

kasarangiya. Ashirucha, Isus wanasiriri tsiyateeru, mang punirustarangana.

(*Matiwa 22.23-33; Lukasa 20.27-40*)

¹⁸ Naateersin, Satúsiypanshuchsha tágaspataishi Isusoo tamapingayani iyshta atusin, Isusush mang kusaranganaya. Satúsiypanshuch mangush nllitarit chinarangana; Tputs tsipakchu, yusur támcheeja, ndambaree waanpatatin mang táraganaya. Isusush kuseersin, ¹⁹ Mayistoroo, Móysisarini yandamarini ateeja;

Tputs wipashartanaari tsipakchu, zoonllsha kizaa yamamaam waritariya. Amb sheeru, zoonllinaam wip izapanimaam taachiya,*

átcha Apanlli kuku. ²⁰ Ashirucha, sirútamasa zoonllin tsimbun matayaru taaranganaya, manga. Wachinsha kizaa yamayaru, wipashari mangu tsiparangiya. ²¹ Zoonllsha kanungasiri máshinlle mashindoo yamayaru, wipashartatam mangu tsiparangiya. Mishat, zoonll ashiritam tsiparangu, ²² zoonllinandari ichingurusin mang ashirangana. Tsimbun matayaru yusirangsin, ashparit wipashartanandarisin mang tsiparangana. Sheeru, kizsha mangutaritam tsiparangiya mipshiritamta.* ²³ Ashiriya, Apanll yusur tputsee ituyamakchu, ¿tamamaam wazaranll panach? watam wazaranllin tsimbun matayaru taaranguwa. Natu, shiyshta kamaningcha; mang, táragana.

* **12:19** Tayusima 25.5-10, misha Matiwa 22.24 tsiyatsis nipta tatsamooru taaritamta. * **12:22** Apanll chtarangu 38.8 tsiyatsis nipta tatsamooru taaritamta.

24 Isussha: Siy Apanlee kuk yasareezis. Apanlee wizpuririni yasartamtazis. Ashirucha, itsinsarus nda tsiyatkis tárangeiya. **25** Itaru, chiya Apanll ituyamakchu, kizaa yamacheezech, ndambaree. Tputs kizaa panacheeja, ndambaree. Apanll wasundurur tamapari ashtachtamchi, tárangeiya. **26** ¿Móysisarineetsi wayandamari nda natstarangis? Móysisarini itsinsaru kamanirangiya; yuwaa chiya Apanll ituyamachu anootsi. Móysisarinpat sumasush Apanll tsiyatarangiya yasin puj shitaru anshu:

Nuwamaricha Apanllina mang, tárange. Zitaminarish Aprahamarini, misha Isaakarini, misha Akoparini aship nuwaa kizpur chinaranganaya; wandaritam nuwaa chinakanaya,* mang, tárangeiya Apanlli. **27** Mazinangantsa; Siy nda itsinsaru chinaksa. ¿Tamaree tsiparina chinach? Watam kchitanawa. Ashirucha, Apanlee chinakana. Ashiri Apanll chiya ituyamachiya átana; mang, tárangeiya Isusu.

(*Matiwa 22.34-40; Lukasa 10.25-28*)

28 Móysispaniri wirkar kamanimapan minu kusarangiya. Yuwash nambanambtar ashirangana anush kusarangiya. Isusoo kuk mazinayaru, mangush chinayaru, Isus wanasiyi yámkiya týayru, uwsha Isusoo mashirangiya: Isusoo, Apanll kamachtamarini yuw ichinguru kasiru anoo kamaningandama, tárange, **29** Isussha: Waamari kasiru an kamanchinllpa, tárangeiya. Móysisarin waneeku, tárangeiya:

* **12:26** Nishuri yuwartatam Tashitungarangu 3.6 átu atitamta.

Israelchichis, na mazinangantsa; Iy kurakarini Apanll Taarashipani minumari taariya. Apanll nllitarita wanindaja. ³⁰ Ashirucha, Apanlee Taarashipanee itsinsaru mangiptish chinangtsa. Chinayarus, uru tchitangtsa. Apanlleetsimarit zurampatari mangiptis mangoonangtsa;* kamachtamarini átcha. Anumaritcha; tárange, ³¹ Anumunsha kamachtamarini tsimbunurinshiti kamanchinchinllpa;

Tputsee chinamari chinangcha. Saanaatsis chinakis ashiritam tputsee chinangtsa; atitamcha; tárangeiya Isusu. Nimarit tsimbunandarit kamachtamarini ichinguroo kasiriya. Nllitarit kamachtashish kasikeeja; tárangeiya Isusu. ³² Móysisarineetsi wirkar kamanimapani: Zuraktishcha, Isusu. Wanásircha kamanirangish, tárangeiya; Iy Apanllirini minumaritcha. Apanll nllitarit wanindaja.* ³³ Chiy wakaraa pachayaruch, mucheeruch, Apanleem ungirtamaam an wanásircha. Itaru, minu kasiru taarcha. Apanlee Taarashipanee itsinsaru mangiptish chinangtsa. Chinayarus, uru tchitangtsa. Apanlleetsimarit zurampatari mangiptis mangoonangtsa;* anumaritcha kasisha. Mishat, tputsee chinamari chinangcha; chaanaatsi tamapari ashiru chinakuch ancha wanásirya, Apanleem wakaraa panakana anootsi; tárangeiya. ³⁴ Móysispaniri wirkar

* **12:30** Nishuri yuwartatam Tayusima 6.4-5 átu atitamta.

* **12:32** Nishuri yuwartatam Tayusima 4.35 átu atitamta.

* **12:33** Nishuri yuwartatam Tayusima 6.5 átu atitamta.

kamanimapan wanasisri tsiyatarangu, Isussha: Zuraktishcha. Shiy wanasisri yámarangsha. Apanllush pshtumaam shiyaam pakchimarisha pshatariya tárangiya. Ambsha ántaru anoo mazinayarasin, nda Isusoo yusur mashirangana.

Ashiri kamaneena yuwa Isusoo imamarpa-maam yusur zandarangana anootsi.

*Mishat, yuwa Isus Apanllish pang' tayaspatarangu anoo kamanchintspa
(Matiwa 22.41-46; Lukasa 20.41-44)*

³⁵⁻³⁷ Isus tputseetssha tayaspatarangia. Anush Apanllish pang' tayaspatarangu, Mazinangtsa, tárangu, Móysisarineetsi wirkar kamanimapan siyaa tayaspataksin, Iyashuch Utaáshuch kizpur tapachindampan tputs kuschiya. Dapiyarinchichish nllurtachiya; átssincha siyaatsi. Itaru, Dapiyarini waantatam tapachindampane: Nuwcha kurakari, táranguwa. ¿Ashiri mayaamshta Dapiyarini waanshucheetstaa nuwcha kurakari át? Dapiyarini tapachindampane kamanku, Apanllimun Wani kamanirangia. Dapiyarini, tárangia tapachindampaneetsi;

Apanll Taarashipan nuwa kurakari, waanaatsi ipusamarini, tárangiya;

Shiy ningich mbutsunungich k'xinangcha.

Nuwsha kundarareetsish tpachingayaruri kasachim;*

Apanll atiya; tárangia Dapiyarini. Ashiri Dapiyarinsha tapachindampaneetsi: Nuwcha kurakari tárangia. ¿Nitaati tputs waanaatsi tiptsiri: Nuwcha kurakari át? nduni. Ashiri

* **12:35-37** Nishuri yuwartatam Salmo 110.1 átu atitamta.

nuw siyaa: ¿An tapachindampani kaapanaa chakchichtaja? atina. Apanllparee Wipaya átana; Isus tputsee tárangeya. Tputssha Isusoo kuk kis mazinarangana.

(Matiwa 23.1-36; Lukasa 20.45-47)

38 Isussha mang tayaspataku, Paptsa; Móysispaniri wirkar kamanimapan tamakanaya shirintspa. An tputs ashku yutaritcha. Wamarshitisin kizpur wanasir kis kamartakana. Ngootsip naakchusin, tputssha: ¿Apanllpanee, tamarimta? tákchusin, maya, anoo kis mazinakana. 39 Shaniyshishush uru tputsee tasaseersin, wanasirimshish kuxinkana. Tputs uwaatssin yambiykchu, uru kurakanungiri kuxinamaam zandkana. 40 Mishat, mashindoo kiyung yachakana; katungtsee kachingta ashkana. Sheersin, Apanllpat kapung tsiyatkana. Wazurani tsiyatstarusin, tuwatspat ashkana. Apanll ashku anoo kizpur wanichiya; mang tputsee, tárangeya.

Ashiri yuwaa Isus Apanllish pang' tayaspatarangu anoo kamaneena.

Mishat, yuwaa Isus Apanlleem kurikee pshtamaam tayaspatarangu anoo kamanchintspha

(Lukasa 21.1-4)

41 Anush Apanllish pang' tayaspatamaam iwapayaru, Isus kurikinung pshtashini kuxineeru, tputs zapanin Apanlleem pshtarangana. Urkirpansha Apanlleem urkir parat shitarusin mang pshtarangana. 42 Sheeru, mashindsha kuseeramchu, uwsha urkiree tsimbunandari Apanlleem mang pshtarangiyi;

pakchitaa pshtarangiya kurikush pshtashini.
⁴³ Isussha anoo pakeeru, wipunasheetssha kuruzurangiya. Kuseersin, Mazinangantsa: mashindsha pukiritaa wamari kasiru pshtarangiya; tárangu. ⁴⁴ Tputs ichingurusin urkiree katuchimawatsim pshtarangana. Itaru, nda mashindsha ashirangiya. Urkiree ichinguru, ashparit pshtarangiya Apanlleema. Nda waama kchitamaam minamtiyam nda ituchirangiya. Ichinguru pshtarangiya; mang, tárangiya Isusu.

Watamcha tsiyatssis Apanlleem kurikee pshtarangana anu.

13

Mishat, yuwaa Apanll zapish anoo Isus kamani-rangu anoo kamanchintspa

(Matiwa 24.1-35; Lukasa 21.5-33)

¹ Apanllish pang' shitungeeru, Isussha wipunash: Ichee, ¿Apanll pang' tamara? tárangu. Patumbichpa wanásirinandari panguma. ¿Ur tamara? ¿Waninll wayaranganaya? mang, tárangiya Isusootsi. ² Isussha: Mazinangantsa; natumasamaam kapung pangus kis pakis. Itaru, arapich tputs Irusarinush kuskatssin, Apanlee pang' izuuru kapitchinllinaya. Patumbich nda tsimbunandayam katuchchinllinaya; ichinguru psinangachiya. Apanll waana zapish ashtachiya, mang, tárangiya.

³ Isus machimun Oliva káreeru, kuxinarangiya, Apanllpat pang' tasaseeru. Pitor, Wang, Ándaris, Sandeek, ashparit Isuspat waani shaniyakamchusin, Isusoo mashirangana. ⁴ Ichee,

¿ashinooja Apanll ashtach? ¿Tamayree wasina yasachini iya? tárangusin, ⁵⁻⁶ Isussha: Ashiri yuwaan Apari ashtachu anoo kamanchintspa, tárangiya.

Paptsa; mamarparintspha; mangiptis taangtsa. Tputs tamapingampani zapan kuschinllinpa. Tayaspataksin, Nuwcha Apanlltana wipi, táchinlliniya. Tputsee zapan tamapingachinllinaya. ⁷ Mishat, tputs waanpatatin pachamamari chinachinllinaya. Tsiyatssis pachashee kapung mazinatssa. Ashiritaa punirintspa. Wand pishtariya. Tsapurunas nda musá kachingchiya. ⁸ Sheeru, tputs tsapurunas ztaru waanpatatin natsakchusin, president wasundururpat arap kíteersin, waanpatatin pachakaktangat ashchinllinaya. Mundaztam mundaztatar ashchiya. Katungats kizpur maringachiya. Tputs aranginasha kiyung kachiyachinllinaya. Ashishtarachu anush Apanll naanllpa tángtsa. Anuri chinangtsa, tárangiya Isusu.

⁹ Itaru, yuwaatssha siyaa kiyung yachinllina kamanchintspa. Paptsa siya. Yuwamand siy nuwaan chinakis anumand siyaatssha putachinllinaya. Putayarasin, kurakush siyaa yutarit tsiyatchinlliniya. Utaáshuchish shaniyshini siyaa pzkoochinlliniya. Gobernadorshutam, misha presidentshutam siyaa tuxiykeeyarusin, yutarit tsiyatchintsa. Itaru, anush siysa yuwaan nuwaan parangis anoo itsinsarus kamaningtsa; tárangu. ¹⁰ Tputssha nuwaan kuki tayaspatachinlliniya. Ichingurusin tsapurunasush nuwaan mazinachinlliniya. ¹¹ Siyaa putakchusin, yutarit tsiyatkitaatssin,

mangis mantsarintspa. ¿Amcheezi nuwa? tárintspa, watam Apanll Wani siyaa tutsiyachtachuwa. Ashkachu an saanamuntari wizpuriris ndusha tsiyataksa. ¹² Mishat, tputs maachiritaatstaa tamapingachinllinaya. Zoonlleewaatstam, wipaatstam, wanireewaatstam, wapareewaatstam tamapingachinllina. Tputs ichingurusin siyaa natsachintsa. Pchangints, watam Isusush tachitkuwa; táchinllinaya nuwamand kamini. ¹³ Itaru, nda sambaytakus, Apanll izuuru tapachindachintsá tárangiya Isusu.

¹⁴ Ashirucha, nee kirakaa natstayarus, nimun mangoonangtsa; nuw Márkosi siyaa atashina. Minootssha yuwaa Apanll Utaáshuchee wanichu anoo Isus kamanirangya. Apanllish pang' wantsush pshtuyarusin, maachi mantsirimash wayachinllinaya,* Isus tárangiya. Yuw Utaásh tsap taakana an anoo pakchusin, machip suwachinllinpa atashina, tárangiya Isusu. ¹⁵ Tputsimun pang' íwar taarinaari, pangush maachi yamaam yusur kanapchazinllinaja, ndambari. ¹⁶ Mzatstaati patatkusin, pangusip kanapchazinllinaja. Utaáshuch ichinguru upusap machip suwachinllinpa. ¹⁷ Kiz kanxupa mapeekina, misha kiz mireerina, ¿an tamaree suwach? Misisina kiyung kachiychinllinaya. ¹⁸ Ashiri Apanllpat tsiyatkus, Minurpas suwatareema tángtsa. ¹⁹ Watam tputs wanipaja kiyung kachiychinllina. Sirútamastaati ashimaa kiyung kachiyshish nda patarusin pangchinllinaya. Sheeru pastakachu, anush

* **13:14** Daniela 9.27 tsiyatsis nipta tatsamooru taaritamta.

nda yusur kiyung kachiychinllinaya. ²⁰ Apanll zar aranginasha kiyung yachakinaariya, tputs minamtiyam kamungcheeja, ndambari. Ashkachinaariya, ichingurusin tsipachpasinaya. Itaru, Apanll waanaatsi tiptsiri kizpur chinayaru, arangeem kiyung yachamaam watsta táchiya, tárangeiya Isusu. ²¹ Tputs siyaa: Pa, in Apanlltanda Wipa, tákchinaari, siysa anoo mazinarintspa. Piy napashini tákchinaariya, anootstam mazinarintspa. ²² Tputssha, Nuw Apanlltana Wipi, tákchu, Nuw kizpur Apanlee kuk kamanimapantana, tákchu, siysa anoo kuk mazinarintspa. Mishat, tputs: Apanlee tiptsir tamapingayani tákchu, yashingoo wizpuririni payuyarusin, kizpur napuxtashimashee nda patarich anoo wayachinllinaya. ²³ Ashiri papcha siya. Wasina siyaa ichinguru kamaneena; Isus tárangeiya wipunasheetsi.

²⁴ Isus tayaspataku, tárangitamta; Apanll tputsee wanimaaam iwatspayaru, anumunsha zar misha tsup kzata ashchiya. ²⁵ Tsangachsha pantsat pantsat ashchinllinaya. Zapani piyari pseertartachiya. ²⁶ Ashkachu anush nuwsha kuskachuri, tputs ashiru msasush karuwatara ashchina.* Apanllpasha wasundurur washunand kurak tamapari ashiruri 'sinish kuschima. ²⁷ Nuwsha sundarureetsi wasina zanganchima. Tputsee yamashini, táchima. Nuwaana ipusarangi anoo yamashinintsa washunanda shaniypani, táchima sundarureetsi. Tsapurunashish shuneeshintsa, táchima, Isus tárangeiya.

* **13:26** Daniela 7.13 tsiyatsis nipta tatsamooru taaritamta.

28 Na siyaa mangeetsis p'tsichintspa. ¿K'payunll tamatareeja? Waru kaneesich yawtakachu, musá yusikiya. Wanuspasaas yasakis. 29 Apanlleem shingtamtsa. Yuwaa Apanll kuschu anoo yasamaam kamiranatamta. Yuwaa ashishtarachu anoo pakeerus, Apanll Wip musápa kuschiya tángtsa. Na pakchimsha pishtariya tángtsa. 30 Mazinangantsa; átis anis ndatuma tsipambarus, kuchima. Yuw ántari an ichinguru tatsamchina. 31 Kanindtam tsapurunastam zapshina pastachparee; itaru nuw kuki pastacheeja, ndambaree.

(Matiwa 24.36-44)

32 Itaru, ¿ashinooja nuwaanaatsi tatsamchi? Minamtiyam tputs anoo yasataktamtazinleeja. Apanll wasundurur íwar taaku antam yasarazinillinaja. Nuw tputseemtaati kinaranguri, ashiritaati yasartamtazi yuwaas kuschi anootsi. Uwamari Aparimti yasariya yuwaas kuschi anootsi. 33 Siy yasareezis. Ashirucha, nuw siyaa atashina; Paptsa; mapiyrus taarintspa. Mangiptis taangtsa, tárangiya.

34 Yusur kuschi anoo ashikpaz ashchi anoo kamanchintspa. Tputs arap napkatu, m'chuchoo: Siysa pangusee ksutangints; tárangu. Nuwsha naachima. Yap nda chinaris amb yusur kuschima. Ashiriya, siysa ksutangints; tputs kustapa. Mzarshi tarawaztangints karuttatpa; týaru, naatarangiya.

35 Ashikpaz ashiritamvis siysa yuwaas nuw kuschi anoo yasartamtazis. Pukamchu nduntaat kuskachuri, schiras kusachparina. Nduntaati ashiru, ktash tandaneeka átu anushparee

kusachparina. Nduntaati ashiru, sitkachu kusachparina. Ashiriya, mangiptis taangtsa; tárangeiya Isusu. ³⁶ ¡Paptsa! Nuwaa kamachtamari kapeetarus, anush kustareema. Mangiptis taangtsa. ³⁷ Siyaa ipunsheetsi tina; tputsee ichinguru atitamana. Mapiyrintspa, tárangeiya Isusu. Táyaru kasarangiya.

Ashiri kamaneena yuwaa Isus waana ashtachu anoo wasina kamanirangu anootsi.

14

Mishat, yuwaa Isusoo tamapingamaam waan-patatin waneerangana anoo kamanchintspa

(Matiwa 26.1-5; Lukasa 22.1-2; Wanga 11.45-53)

¹ Tsimbunandamsha zar shambatshish yuw Ijiptoo tsap shitungarangana an pishtarangu, misha pangaa nda tpootaru anoo katungumaam shaniyshisheem,* anush Utaáshuch urkar Isusoo pachamaam tsiyataranganaya.

* **14:1** Utaáshuch Páskuwarini zar shaniyshisheem tsurtarangana. Utaáshuch tputs uru waanaatsi mang' p'tsimaam Irusarinap naatarangana. Irusarinush shaniyarangsin, yambiyarusin, mangooz p'tseerangana; yuwaa Apanll Ijiptosh tapachindarangu anootsi. Sirútamasa Ijiptosh Utaáshuchee itutsimaam waritarangu anush opeeja pachayarusin, Apanllsha Utaáshuchee wip pachamaam watsta tárangeiya. Ashirucha, natsha Utaáshuch waanaatsi mang' p'tsimaam uru minush masach shaniy, yusur minush masach shaniy ashkana. An watacha zar sura Utaáshuch Páskuwarini atiniya anu. Anpur pangaa nda tpootaru anoo katungtaranaya. Ashiriya, anpuru Utaáshuch urkar Isusoo pachamaam kizpur mang zandaranganaya.

Ashiri Móysispaniri wirkar kamanimapani: ¿Tamaycheezini Isusoo tamapingayaruni putachini? Pachayani, tárangashinllanaya. ² Xamachi, watam na shaniymaam waritayanlluwa. Tputs yasayarusin kapung tsiyantachpasinaya. Apinlliri putayani táranganaya.

(Matiwa 26.6-13; Wanga 12.1-8)

³ Ashiri Isus Betaniyash taarangu, Simosh, wanuts itsaptaku anush pang' maamaw katungtungtar ashirangiya. Kizsha kzammashhee patumbchish kachutamash tuzururu, payuru kusarangiya. Wayungunoo nartupat wach tinama. Puteeraa ship pátangayaru, Isusumun much ichumarangu, arap waritaru anootsi.

⁴ Tputssha anoo pakeersin, tsiyantaksin, waanpatatin: ¿Mayaamsha kiz mangu kzammashhee itsanka? ⁵ Ndunariya itsanarangu, panayarina, kurikee zapan putachparee, watam minam masach kurikeem tarawaztakuch anumand waritakuwa. Sheeranaari, kurikee pukireem panamaam waritchiya, tárangana. ¿Shiy mangish nduntishtee? tárangana kizaatsi. ⁶ Itaru, Isussha: Watsta; kizaa nambintspa. ¿Mayaamsha tamundaksa? Nuwaa chinaku ungirtaku ashkiya; tárangu. ⁷ Pukir tputs siyash uru taariya. Ashiriya, yuwash zar waritakchu anush siysa pukireem istatssa. Itaru, nuw kapung taacheezi, ndambari.

⁸ Itaru, kizsha nuwaa nayaniku, kzammashpa ichumarangiya. Nuwaa niri mapumaam átu ashkiya. ⁹ Siyaa atashina; in kiz ashirangu anoo tputs ichinguru tsapurunasshuch ztarsin mazinachinllinaya. Zapshitaa nuwaa kuki mazinakchusin, Kiz kzammashhee Isusumun

much ichumarangu; ántachinllinaya. Anoo mbizamaam wanindaja, tárangeiya Isusu.

(Matiwa 26.14-16; Lukasa 22.3-6)

¹⁰ Isus wipunashimuna Utaásarini; misha Iskáriyota tsurtarangitamta. Uwsha Isusoo tamapingamaam zandarangu anoom tsiyatpi átu Apanllip pang' naatarangiya. ¹¹ Kuraksha anoo mazinayarisin, mang' ksarangana. Yungparutishcha átish. Ashiri aship tuwapchinllpa mang týayarusin, Utaásarinsha: Waritachparee mang, tárangeiya. Shitungeeru, Isusoo mangush tamapingamaam chinranganya. ¿Tamayareezi tamapingachee? týayaru, anuri mangush chinranganya.

Ashiri yuwaa Isusoo tamapingamaam waneerangana anoo kamaneena.

Minootssha kamanchintspa; yuwaa Isus waanpata týaspatašpat shambatshish yuw Ijiptoo tsap shitungarangana anush zar katungarangana anoots

(Matiwa 26.17-25; Lukasa 22.7-14; Wanga 13.21-30)

¹² Yuwash zar opeejaa pachamaam tatsameenllu anush opeejaa pangapat nda tpootaru anpat katungamaam waritarangiya. Ashiri wipunashsha Isusoo: ¿Yapeeja shambatshishish yuw Ijiptoo tsap shitungarangana anush zar katungumaam yarchini? tárangeana. ¹³ Isussha wipunashee tsimbun kamachtarangiya. Mazinangantsa; Irusarinush pshtuyarus, kamuz tipayashinu, suwee kuktachu pakchus, anshuri tchitangtsa; tárange. ¹⁴ Pangush pshtukchu, pshtungtamtsa. Siysa upaturunareetsi pakchus,

mashangtsa; ¿Yapeeja shambatshishish yuw Ijiptoo tsap shitungarangana anush zar katungchinee? ¿Tandapunuz nuwaam yararangish an yapeeja? átcha iy mayistorurini áttanda, tángtsa. ¹⁵ Mashkachus, uwsha tandapunuzee kapung yámandachiya. Pangusish iwaz wach taariya. Anush misaa, kuxinshishee ichinguru pangatssa. Pakeerus, katungtsee yarangtsa, mang, tárangiya Isusu. ¹⁶ Ayu táyarusin, naatarangana. Yaktash kuseeramchusin, ichinguru mang parangana. Isus yuwartatam, tárangu anoo ashparitam parangana. Pakeersin, mang Isusoom yararanganaya.

¹⁷⁻¹⁸ Ashiriya, tapittanu Isus kusarangya wipunashpata. Misamun pshiyrarutarusin, katungkusin, anush Isussha: Nish tamapingampán minam taarcha. Naturi nuwapat katungkiya; tárangiya. ¹⁹ Wipunashsha mang' kapung mantsaranganaya. Sheeru, minsha tputs: ¿Nuwaatseezuwa átshawa? minsha: ¿Nuwaatseezuwa átshawa? ántarach ashirangana. Ichingurusin masharanganaya. ²⁰ Isussha: Nuwpa ipunshi nuwapa pangaa mangawash washunand pshtaku anparee tamapingachindaniya; tárangu. ²¹ Apari kuk sirú nuwaa kamanirangu, Tputs shiyya tamapingakchu, shiysha tsipachsha; tárangiya. Nuwsha tputseem kinarangitaati tsipachima. Itaru, tamapingampanteetsha Aparshiti kizpur wanichiya; ndunariya nllurtarangu ashireeja Apari wánich; mang, tárangiya Isusu.

(*Matiwa 26.26-30; Lukasa 22.15-20; 1 Koríndo 11.23-25*)

²² Ántarangu, katungkusin, pangaa yáyaru, Waparee: Wappari týaru, tupta tupta sheeru, pangaa wipunasheem martarangiya. Wipunasheetssha: Mazinangantsa, tárangu. Neewa; panga nuwaanapaz nutsshí ashipaz ashitanda. Wanásir ktungangints. Nuwamand nutsi Apanll siyaa tapachindachintsa; tárangiya Isusu. Týaru, martarangiya. ²³ Sheeru, Isus mangawaatssha yáyaru, Waparpa tsiyateeru, yásirangiya. ²⁴ Neewa; insha waashish nuwaanapaz kurásiri ashipaz ashitanda. Nuwsha kurásiri parungakchu, tputseem ichinguru tsipachima tputsee tapachindamaama;* Isus mang týaru, wipunasheemshat minumsha yásta minumsha yásta ashirangiya. Ichingurusin waarrangana. ²⁵ Mazinangantsa; Yusur nimun kizarun chinuz wayari vinoo nuw waachtazi, ndambaree. Itaru, yusur kuskachuri, siyaa yamayaruri, Apapush watsapuni yusurshapa shaniyeeruni, washunandshapari waachchi nuwaptaya; mang, tárangiya Isusu. ²⁶ Apanlee yaseeyarandsin, psaanaritam shitungarangana. Sheeru, machip naatarangana, yap yasin suru Oliva zapan taaru ambi.

Ashiri yuwaa Isus wipunashpat washunand shambatshish zar katungarangana anoo kama-neena.

Mishat, yuwaa Isusoo putarangana anoo kamanchintspa

(Matiwa 26.31-35; Lukasa 22.31-34; Wanga

* **14:24** Jeremiyasa 31.31; Sakáriyasa 9.11; 1 Koríndshucheema 11.25; 2 Koríndshucheema 3.6; Utaáshucheema 9.20 tsiyatsis nipta tatsamooru taaritamta.

13.36-38)

²⁷ Anuritam machip Olivap kuseersin, Isus wipunasheetssha: Na in psaan ichingurus punikchus, nuwaa kasachpasa, tárangiya. Apari kuk anootstam wasina kamanirangiya;

Opeej ksutamapanee pachachinllinaya. Pachayarusin, opeejsha ichinguru suwach-pasinaya;

átcha Apari kuk nuwaatsi. ²⁸ Ashiri tsipayaruri, yusur támearuri, wasina Galileyap naachima. Anush pangchinipa; tárangu Isusu. ²⁹ Pitorsha: Ichingurusin shiyaa kasakchusin, nuwsha shiyaa kasacheezi, ndambari, tárangu, ³⁰ Isussha: Pitoroo, mazinangancha; itsinsaru kamanchinllpa. Na in ndatuma ktash tsimbun yusaru, shiysa tputsee: Nuw Isusoo yasakeezi táchsha. Tuchip tayusichsha; mang, tárangiya Isusu. ³¹ Pitorsha kizpur tsiyatatar, ¿Tamaree nuw ashchee? Nuwaa pachaktaatesinaya, nuw Isusoo yasareezi táchheezi, ndambaree. Shiyaptari tsipachchi, tárangiya. Wipunashsha ichingurusin annandarit tsiyataranganaya.

(Matiwa 26.36-46; Lukasa 22.39-46)

³² Psaanaritam Isus wipunashpa ipuneersin, mzatsip sur Getsemanap naatarangana. Kuseeramchusin, Isussha wipunasheetsi: Xamachimasi: nish k'xinangints. Aparpatamasi tsiyatatasima týaranllu, ³³ tuchpamsha tputs machirangiya. Pitoroo, misha Sandeekurini, misha Wanga aship Isus, machirangiya. Naantaatssin, Isussha mangush ksukpaz ashirangiya; mangush wantsush tumanarangiya. ³⁴ Mangi kizpur mantsakuri, tsipakchima. Siysa

neetsiritamapa ksutangtsa. Tputs kustapa; tárangeya. ³⁵⁻³⁶ Pakich naantachu, mang' kizpur mantsayaru, tsapush tutunlltaramach ashirangu; Tapachindapanda átu Waparpat tsiyatarangiya. Apaa, shiyaam ichinguru waritariya. Apaa, tapachindangandama. Nuw kiyung kachiyeeri, tsipamaam zandkeezi, tárange. Itaru, yuwaa nuw áti anu watsitparee. Yuw shiy shaana zandkush shingandama, Apaa; mang, tárangeya Isusu.

³⁷ Wipunashishsha napkamchu, wipunashishsha maakururtar ashirangana. Isus Pitorootssha: ¿Simo maarish? ¿Minamtiyam ura ksutamaam pinasarangish? tárange. ³⁸ Támeerus Apanllpat tsiyatangtsa. Paptsa; Yashing' kasiyantspa. Apanllpat tsiyatamaam zandamana zandkitateesa, itaru maats kasikantsa; támbeeshinu kasarangiya.

³⁹ Kasayaru, yusur waptam kanapeeranllu, Apanllpat tsiyatangiya. Yuvari ichtaru, tárange anuritam tayusarangiya. ⁴⁰ Yusursha wipunashish kuskamchu, wipunashee yusur maamarsin parangiya, watam maats zuw zuw ashiranguwa. ⁴¹ Anamunsha Isus yusur wipunashish tuchparinshtini kusarangiya. ¿Wand maaris, kanuskis? Na waritayanlliya. Na musásiri tputs yutarit nuwaa, Apanlleetstaati wipi tamapingachindanaya. Tamapingayarusin, Romshuchetssha: Neewa; siysa waneengtsa táchinlliniya nuwaatsi; tárange. ⁴² Pza, naayani. Paptsa tamapingampani naanllpa, tárangeya.

(*Matiwa 26.47-56; Lukasa 22.47-53; Wanga 18.3-12*)

⁴³ Isus wandari tsiyatstaru anush waana wipunash Utaásarini kusarangiya. Tputs zapan

mchit payurutarusin, yasinaa washitaneewtam payurutarusin, kusartarangana Isusoo putamaama. Kamachtarangiya Utaáshuch apanllpan urkari; misha wachinawin, misha Móysispaniri wirkar kamanimapani kamachtarangitamta. ⁴⁴ Ndaturi kusaru, Utaásarini tputsee kamanirangya; Nuw Isusoo ishambchima; tárange, Ishambkachuri, an watatanda Isusu. Siysa p'tangtsa. Siysa putayarus machingtsa; suwatpa; tárange.

⁴⁵ Ashiri Isusush kuskamchu, Utaásarinsha musásiritam Isusush iriptaranllu, Mayistoroo, ¿tamarimta? týaru, ishambta ashkamchu, ⁴⁶⁻⁴⁷ tputssha Isusoo putarangana. Itaru, wipunash minamta watsirit xiyxeeuw punirustarangu, mchit yáyaru, tputsee mang tpimbarangiya. Apanllpanee urkar muchchuree witsi t'sharangya. ⁴⁸ Sheeru, Isus tputspat tsiyatarangya. ¿Mayangazsha psaan yasin payurutarus kusaksa? ¿Nitaati nuw washchirshiti? ¿Antaati nuw siyaa kapeetamaam tputsee ishinkee? ⁴⁹ ¿Wanipaja kamiran Apanllish pang' tayaspatarangee? ¿Mayaatsi punikus nda putarangsa kamiranata? Apanll kuk yandarangu anoo tatsamkachu nuwaa putaka; Isus tárange. ⁵⁰ Átaru anoo wipunashtisin mazinayarusin, ichingurusin Isusoo kasayarusin, suwasuwarangana. Isusoo kasarangana. ⁵¹ Itaru, tputssha kanungas wazurani k'tuntambaru, Isusush tachitarangya. Uwaatssha putayarusin, ⁵² kamisaa tusheeru, zapeeruri suwarangya.

Ashiri yuwaa Isusoo putarangana anoo kama-neena.

*Mishat, kamanchintspa; yuwaa Utaáshuch urkar Isusoo pchangtsa tárangana anootsi
(Matiwa 26.57-68; Lukasa 22.54-55, 63-71;
Wanga 18.13-14, 19-24)*

⁵³ Ashirucha, anuritam machtarangusin, apanllpanish urkar pang' tapshturangana. Anush Utaáshuch urkar, misha Utaáshuchtisin wachinaw, misha Móysispaniri wirkar kamanimapani aship shaniyarangana. ⁵⁴ Itaru, Pitor arapirit mang tachitarangiya. Apanllpanish pang' pshturangita-mta. Pshtuyaru, tipuranllizee sumasish chuchurangiya apanllpanpat muchchuri.

⁵⁵ Ashiri apanllpan urkar, wachinawtam: Isusoo pachayani, táyarusin, tputsee ngichimapani nachungarangana. Siysa Isusoo yutarit tsiyatangtsa. Ngicheerus, iysha tupchayani táraganaya. Tsimbunis minamari k'kuz payukinaareesa, ashiri pachamaam waritariya, tárangana. Itaru, tsimbun tputs nda minamari k'kuz payuranganaya; naxpoorangana. ⁵⁶ Mangu piyari tsiyat piyari tsiyat ashirangana. Nda waanandarit tsiyatarangana. ⁵⁷ Zapish ashpatam tputs chiyzarangusin, ⁵⁸ Isusoo kitsiptartini mazinarangini. Isus taarangeeja: Apanlee pang' uwpa pangurangana anoo nuw kapeetkachuri, tuchipparee zar yusur panguchina; itaru nda kuwihti panguchina átu anoo mazinarangini, tárangana ngichimapani. ⁵⁹ Anoo zapan tsiyatarangitaatssin, ashiritaa nda waanand tsiyatarangana.

⁶⁰ Ashiri apanllpansha urkar anoo mazinayaru, chiyzayaru, Isusootssha: ¿Mayaamsha nda tsiyataksha? Tputs tsiyatkusin, ¿mayaamsha nda

yámaksha? tárangiya. ⁶¹ Itaru, Isussha zamazamaw ashirangu, nda yámarangiya. Apanllpansha urkar: ¿Apanllish Ípusamarini shiya? tárangiya. ⁶² Isussha: Aa, yuw átis an watatana, tárang. Apanll nuwaa tputseem tinarangu, nuwsha Apanllinungiri taachima; msasush karuwkachuri pangchitampasa,* tárangiya Isusu.

⁶³⁻⁶⁴ Ashiri apanllpan urkar anoo mazinayaru, waanaatsi wamari izichirangiya. ¿Wanipa ngichik? watam nuw Apanlltana Wipi atuwa. ¿Mayaamaja yusur tputsee mashchi, watam ichinguruni mazinayaniwa? ¿Wanip Apanlee ngichik? Ashiriya, ¿siy amaksa anootsi? tárangiya apanllpan urkari. Tputssha ichingurusin: Aa, pachamaam waritayanllcha, tárangana.

⁶⁵ Tputssha Isusumunsha kawachitangat ashirangana.* Chirik'pat wchoo kámanayarasin, tuzim tuzim ashirangana. Tuzim sheersin, Natu, kamaninda ¿chak tuzimkanlla? átangat ashirangana. Sheersin, apanllpansha muchchur Isusoo macheerandsin Isusoo tuzimumach ashirangana.

(*Matiwa 26.69-75; Lukasa 22.56-62; Wanga 18.15-18, 25-27*)

⁶⁶ Ashiri Pitor tipuranllizush taarangu, apanllpan urkar muchchur, kiz kusarangu. ⁶⁷ Pitoroo chuchuchuw parangu, nap ashirangiya. Kizsha mang: Shiy Isuspat Násaretshuchpat ipunarangish, tárang, ⁶⁸ Pitorsha: Nitaati anoo tputsee yasareezi. ¿Chakamasaja? ¿Mayaamsha nuwaa ngutish

* **14:62** Daniela 7.13 tsiyatsis nipta tatsamooru taaritamta.

* **14:65** Isáysa 50.6 tsiyatsis nipta tatsamooru taaritamta.

átsha? táyaru, shitungashinung xiyaa ashirangshita Pitoru.

⁶⁹ Muchchursha, kiz anushsha pakeeru, tputseetssha: In tputs Isuspat ipunarangtamcha, Wipunashparee Isusuya, kiz Pitoroo, tárangu, ⁷⁰ Pitorsha: Nitaati nuw Isusoo ipunsheezi, dancha; tárangiya. Yusur mishat tputs musásiritam: Zurakparee, shiy Isuspasha wipunashsha, watam Galileyshuchtamshawa; mang táyaru, ⁷¹ Pitorsha mantsir kapung tsiyatarangiya. Yuwaa átish anoo yasareezi. Ngichkinaareena, anumand Apanll nuwaa pcharundama, tárangiya. ⁷² Támpu, musásiritam ktash taraseemaam yusarangiya tsimbunurinshtini. Mangush Pitor chinayaru p'tseerangiya yuwaa Isus kamanirangu anootsi; Ndatuma ktash tsimbun yusaru, shyma tputsee: Nuw Isusoo yasareezi táchsha. Tuchip tayusichsha, tárangu anootsi. Isusoo kuk chinayaru, kizpur mang' mantsayaru, tanurangiya.

Ashiri yuwaa Utaáshuch urkar Isusoo pchangtsa, tárangana anoo kamaneena.

15

Mishat, yuwaa Romshuch urkar Isusoo pchangtsi, tárangu anoo kamanchintspa

(Matiwa 27.1-2, 11-14; Lukasa 23.1-5; Wanga 18.29-38)

¹ Zar yarattu Utaáshuch urkar ichinguru mang shaniyarangana. Apanllpan urkar shaniy, Móysispaniri wirkar kamanimapan shaniy, aship an shaniyarangana. Tsiyatstangat ashirangana. Isusoo tsiyatamaam iwapayarusin,

uwee kamurirusin, gobernadorap mang machtarangana. Gobernador Pilat sura.

² Pilatush kuseersin, Pilaturinsha Isusoo mashirangu; ¿shiy Utaáshuchpasha urkarsha? táyaru, Isussha: Aa, nuw Utaáshuchtana nuw kuraki, tárangeiya. ³ Utaáshuch urkar zapan yutarit tsiyatarangiya Isusootsi. Isus yámarangeeja.

⁴ Ashiri, Pilaturinsha Isusoo: ¿Mayaamsha nda yámaksha? ¿Wanipaj tputs yutarit tsiyatkana? tárangeiya. ⁵ Itaru, Isussha nda yámarangu, Pilaturinsha ¿Tamashta nda tsiyatak? mangush, tárangeiya.

(*Matiwa 27.15-26; Lukasa 23.13-25; Wanga 18.39—19.16*)

⁶ Uru minam masach tushiykchu, tputs Apanllee ungirtamaam shaniyatssin, Utaáshuch Pilaturineetsi tputsee tashitungamaam mashirangana. Pilaturinsha uru mangutari minam tputsee tashitungtariya. ⁷ Anush tumanshishish tputs yutarit taaranganaya. Sirú gobernoo kasiyaruni kapeeteeni atusin, waratarangsin, tputsee pacharangana.

Ashirucha, anush Parápsa tputs sura anush tumanarangiya. ⁸ Ashiri tputs Pilaturinush kuseersin, Na waritayanlliya tputsee tashitungamaama. Na shiysha tputsee tashitungangcha, watam uru tashitungakshawa; tárangeiana.

⁹ Pilaturinsha: ¿Chakaa tashitungamaam zandaksa? ¿Utaáshucheezuwa kuraka Isusoo tapurichchiwa? tárangeiya tputseetsi. ¹⁰ Watam Pilaturini Utaáshuchee urkar yasaranguwa. Mangutari Isusoo natsaksin, Pchangi, tárangeiana. ¿Chakaatsi tashitungayachis? tárangeiya.

11 Nduma tputs yámchusin apanllpansha urkar tputsee: Ichingurus: Parápsaa tshitungangcha tángtsa. Isusoo tpurinllpa tángtsa; tárangana.

12 Pilaturinsha: ¿Iy kurakarini átis anoo tamacheezi? ¿tapurcheezi? tárangu, **13** tputssha kizpur zamangarangusin, Nduni. Pachayarush ksangi. Yasinamun tstsambeerush ksangi. Kpitangi; átangat ashirangana, manga. **14** Itaru, Pilaturinsha ¿Mayamandshta pachachee; watam nda yutarit taaranguwa? tárangya. Tputssha anoo mazinayarusin, aranginasha zamangarangana. Yasinamun tstsambeerush ksangi átangat ashirangana.

15 Pilaturinsha tputsee mang' kistamaam zandarangu, Ayu, Parápsaa tshitungangints týaru, tashitungarangana. Pilaturinsha wasundururee kamachtarangya; Isusoo pzkooyarus, ksangints, tárangya. Utaáshuchetssha urkar tsiyatku; Siysa Isusoo taringsints. Tstsambeerus ksangints, tárangya.

(*Matiwa 27.27-31; Wanga 19.2-3*)

16 Sundarsha Isusoo machtarangusin, kurakush pang' sur Pirítoriyush tapshturangana. Kuseeramchusin, sundar waanpatatin zapan kuruzurangana. **17** Shaniyeersin, michitkusin, Isusoo kurakaam ínachinllpa atusin, kpapat k'tayashinusin, tútiyachtarangana; watunireem tuwapimash ktsachimash túmartarangana.

18 Napangi ¿Utaáshuch urkar tamara? táranganaya.

19 Sundar yasinpat tiyáh tiyáh, kawachta, tutunlltata shitangat ashirangana. **20** Wamaree ktsachimash yusur tusheersin, yusur watunirtam

tuwatuntayarusin, yasinamun ttsapani atusin,
chapungup machtaranganaya.

Ashiri wappari kamaneena yuwaa Isusoo
pchangtsa, tárangana anootsi.

Na kamanchintspa yuwaa Isusoo natam pacharangana anootsi

(*Matiwa 27.32-56; Lukasa 23.26-49; Wanga 19.17-30*)

²¹ Sim Sirínhuchi chapungup naatarangiya. Sim wip Arijandoru misha Arójó. Sundar Simoo chamayangayaru, Natu shiysha yasinaa kungi Isusoom ttsamaama, atusin, kamachtarangana. Uwsha Sim kúrangiya yasinaatsi. ²² Ashirucha, Isusoo pachamaam machtayarusin, machip kararangana. An machi sura Muchuzcha; iyashuch Utaáshuch k'kini Gólgota atiniya.

²³ Kuseersin, yasinpat wakunguri sura mira vinpa íseersin, kshaa yáseeni,* tárangana. Isusoo waangi atusin, Isussha ngatarangiya. ²⁴ Sheersin, Isusoo yasinamun ttsarangana. Sundarsha Isusoo wamar ichinguru tusheersin, waanpatatin ipusimaam wicipat mang michitarangana. Michiteersin, wamarue uwaya yaktaam uwaya yaktaam ashirangana manga.*

²⁵ Ashiri ttsarangana Isusootsi zar manginaa kachingarattu. ²⁶ Isusumun yasinamun muchinungi yandamarini wayarangana. Yuwamand Isusoo pacharangana anoo kamanirangya. Yandamarini kamanirangya;

* **15:23** Salmo 69.21 tsiyatsis nipta tatsamooru taaritamta.

* **15:24** Salmo 22.18 tsiyatsis nipta tatsamooru taaritamta.

Isus Utaáshuch urkarcha táyarusin yandarangana.
27-28 Pachampaneetssha min mbutsutsunungich ningich tstsarangana. Minootssha mbazinungich arangich mang tstsarangana.*

29 Tputssha tushiykchusin, zapan napta napta ashkusin, Isusoo staranganaya. Mantsiri tsiyataranganaya.* ¿Tamasha nda shaanaatsi tapachindaksha? ¿Shiy watam: Nuwna zandkuri, Apanlee pang' kapeetkachuri, yusur tuchip zari panguchina, tárangshawa?
30 Apanleesha Wipish, ashiru yasinamun karuwangcha tárangana. **31** Apanllpansha urkar, misha Utaáshuch tayaspatañpan yutarittam tsiyat tsiyat ashirangana. Tputsee nllitarit istataritaa, ¿Tamasha nda waanaatsi nda tapachindaka? tárangana. **32** Isus, Utaáshuch urkar karuwkachu, iysha anoo pakeerurini, mangoonachshapariniya; tárangana apanllpan urkari. Washchir yuwaptatin tstsarangana anpatatin Isusoo yutarit tsiyatarangitamana.

33 Ashiri zar wachamuree kizpur tapee ashirangiya. Zar kzata ashirangiya. Zapishsha, zar pukamchu, yusursha zar yakatan ashirangiya. **34** Pukamchu zar Isus kuruzurangu; Apaa, ¿mayaamsha nuwaa kasaksha?* tárangeiya. Waanshuchi kuk: Iríy Iríy aráma sapáktani, tárangeiya, **35** Ashiri tputssha xiyeewsin mazinarangana. Za, Elíyasarineetsi kuruzeenllpa

* **15:27-28** Versícul 28 kaap wanindaja. Ashpatam kirak anoo taar, itaru Márkosarin nda kaap yandarangiya. * **15:29** Salmo 22.7 tsiyatsis nipta tatsamooru taaritamta. * **15:34** Nishuri yuwartatam Salmo 22.1 átu atitamta.

tárangana. ³⁶ Minam tputs iriptaranllu, vinoo kash yushindarangiya. Shambushambu yáyaru, kshash chka sheeru, yasinamun turimeeru, Isusush kuk tunapurangiya waamaama.* Panayaru, Xamachimasi: Na pangpani, tárangana. ¿Kamapari Elíyasarini kuscheezuwa yaruwamaama? tárangana.

³⁷⁻³⁸ Isussha tsiyatku kizpur zunganeerangu anush tsiparangiya. Apanllush pang' kamis, ipusanand izichirangiya. Íwar káyashinu, chireej ashirangiya. ³⁹ Ashiri Isus tsipakchu, kapitansha anush tasaseeru xiyxewu, yuwaa ashirangu anoo parangu, In tputs Apanlliritcha wipa, tárangia.

⁴⁰ Kizsha arapeetari naparangana. Salómi, misha Mariya Matárinshuchi, misha Mariya Sandeek nllur waniri, Us Mariya wanirimunamatamta; aship kiz ksutarangana. ⁴¹ Sirú ndaturi pacharsin, Isus Galileyash taarangu, anush tachitarusin, Isusoo istarangana. Zapan kiz tachiteersin, Irusarinush kusarangana an ichingurusin Isusoo ksutarangana.

(*Matiwa 27.57-61; Lukasa 23.50-56; Wanga 19.38-42*)

⁴² Ashiri zar pshtututanu sápatoomsha wasina yaramaam waritarangiya sápatooma.

⁴³ Ashiri natumamatam viernesash Osiysha, Arímatíyshuchi* tputsi, Isusoo maapi átu Pilaturinpat tsiyatarangiya mashamaama. Us Utaáshuch urkarimuntamcha; kizpur

* **15:36** Salmo 69.21 tsiyatsis nipta tatsamooru taaritamta.

* **15:43** 1 Samuela 1.1 Rama, átcha. Watatamcha yakta.

wanasirimun tputsi. Apanlee kizpur chinaku, uru Apanlleem Ipusamarini kutarangiya. Ashiri Us nda puniku, Pilaturinpat tsiyatku, mashirangiya. Isusurini yáyaruri, mapchima, mang, tárangeiya. ⁴⁴ Pilaturinsha mangush chinayaru, Isus tsiparangeeja átu, kapitanaa kuruzeeru, mashirangiya. ¿Isus tsiparang? tárangeiya. ⁴⁵ Kapitansha: Aa, tsiparangcha; týaru, Pilaturinsha Usee: Ayu, Isusurini yángsi; týaru, ⁴⁶ Ussha kamisaa mburshimashi wanasiri paxanxeeru, Isusoo naruwayaru, kamispat kuripirangiya. Yáyaranllu, mapshisheem patumbchee kachutarangana anush Isusoo wayarangiya. Wachoo patumbichpatatam mbam shtandarangiya. ⁴⁷ Mariy Matárinshuch, misha Mariy, Us waniri parangana Isusurineetsi wayarangana anootsi.

Ashiri yuwaa Isusoo pacharangana anoo kamaneena.

16

Mishat, yuwaa Isus támarangu anoo kamanch-intspa

(Matiwa 28.1-8; Lukasa 24.1-12; Wanga 20.1-10)

¹ Ashiri, sápatush zari pukamchu, Mariy Matárinshuch, anamunsha Mariy, Sandeek wanir, anamunsha Salómi, kiz tuchip kzammashée paxanxarangana Isusurinimuni ichumamaama. ² Putamsha tumingush, kizsha mapshiship napkatssin, mang naatarangana. Zari yak ashiratu, kusarangana mapshishu. ³ Kuskamchusin, kiz waanpatatin ¿Chakaja

chiyaam tawateechinllina wachootsi? Patumbich kiyak tstsamawa; tárangana.

⁴ Ashiri nap ashkusin, mapshish mangu wach' kawaru parangana. Patumbichsha kapeetamsha parangana. ⁵ Ashirucha, wachush wantsush pshtuyarusin, napkusin kanungas ashiru parangana. Wamar mburish wazuran k'tuntambaru, mapshishish mbazinungich kuxinxinawu parangana. Kizsha kizpur punirangana. ⁶ Kanungassha: Punirintspa. ¿Isusoo Násaretshuchi nachungakis yasinamun tstsarangana anungazi? Isus támeenllcha. Watacha yuwash tamoo ashirangu anu. Ndunshitaya, tárange. ⁷ Mikeerus naatstsa. Isusoo wipunash ichinguroots kamaningtsa Pitorootstamta. Isus Galileyap wasina naayaranllpa. Ambi naakchus, Isusoo pangatssa, watam Isus ndaturi tsiparu siyaa kamaniranguwa; tángtsa; tárangeiya kanungasi. ⁸ Kizsha puniksin iripupur ashirangana. Nungtatangat mang ashirangana. Punirustambatssin, nda tputsee kamanirangana. Kuk mbamatambach ashirangana.

(*Matiwa 28.9-10; Wanga 20.11-18*)

⁹ Ashiri Isus tumingush puturit támeeranllu, ichtaru Mariya Matárinshuchi parangiya yuwachich tsimbun matayaru yashingoo tashitungarangu anchich. ¹⁰ Mariysha nattu, kuseeramchu, Isus wipunash mang' mantsaksin, tanuksin, uwsha kamanirangiya. ¹¹ Itaru, Isussha wipunash: Mangupa atiya tárangana.

(*Lukasa 24.13-35*)

¹² Ashiri natam Isus wipunash yaktash tsimbun Irusarinush shitungeersin, xiytusin, yap

nda chinaru anush Isus wipunasheetsi mang kamatarangiya. Nda Isusoo natstarangana, watam nllitaritamsha kinaranguwa. ¹³ Zapish natstayarusin, kanapurangsin, minootssha wipunashpatatin ichinguru kamanirangana. Ngootsip xiytuni, Isusoo parangtanicha, tárangana. Itaru, wipunashtisin: Ngutishcha átis, táranganaaya.

(Matiwa 28.16-20; Lukasa 24.36-49; Wanga 20.19-23; Tayaspatampani 1.6-8)

¹⁴ Ashiri natam wipunash arangtach minam matayaru katungkusin, anshutam Isus yakarangiya. Yakayasha, waneerangiya wipunasheetsi. ¿Washa nda mangoonkis yuwa, táangi anootsi? tárange. ¿Mangishis chinamaam washashbam ashkis? Yuwa támeeruri, tputssha: Isusoo iy parangini. Na kchitcha táyarusin, ¿siysa tamasha nda mangoonarangsa? ¹⁵ Na siysa nimun piyam naakus, piyam naakus, sheerus, tsapurunasee izataru nuwaa kuki tayapstangtsa. Ichingurus tputsee tayaspatangtsa. ¹⁶ Yuw tputs nuwaa mangoonku, siysa ichumakis an tputs uru kamungchinlliniya. Itaru, yuw tputs nuwaa nda mangoonku yashingupsha naachiya. ¹⁷ Yuw tputs nuwaa mangoonkachu an nuwaa Apari wizpuririni payuchpasinaya. Nuwapa wizpuriri yashingoo tashitungachinllinaya. Ashpatam nllitaritaa k'kuz nduntaa yasaru tsiyatchinllinaya. ¹⁸ Mkaa putaktaa, nda kapooxchiya. Wasoo waaktaa, nda tsipachiya. Kas yutamaa uwpat patatkachu yarchiya; táangiya Isusu.

(Lukasa 24.50-53; Tayaspatampani 1.9-11)

19 Ashiri minush zar Isus, iy kurakarini, wipunashee waneeyaranllu, Apanll Isusoo naringarangu, kizpur kurakaam kinayaru Waparish mbutsinungich kuxinarangiya.

20 Wipunashsha ichinguru tsapurunas ztaru Isusoo kuk kamanirangana. Tayaspatarangusin, Isus waana istarangu, Isusoo wizpuririni yámandat yámandat ashirangsin, tputssha: Aa, zurakparee, Itsinsaru tayaspatakana, tárangana.

Ashiri yuwaa Isus támeeranllu yusur Waparip naatarangu anoo kamaneena.

Watamcha Isus kuku. Ashiri wapparee.

[Watamaritcha Isus kuku. Wapparee.]

**Apanlli Kuku
New Testament in Candoshi-Shapra
(PE:cbu:Candoshi-Shapra)**

copyright © 2010 Wycliffe Bible Translators, Inc.

Language: Candoshi-Shapra

Translation by: Wycliffe Bible Translators, Inc.

Candoshi-Shapra

cbu

Peru

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Candoshi-Shapra

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files
dated 29 Jan 2022

855c1646-aaa4-5dab-a701-8197de4af05f